

## **Yonna Yesusmoa. Yonmba Ishomnavna Yesusm, Sesoana Ombolm.**

### *Sesoana Moamba Os Nilhana, Ona Indhanarini.*

<sup>1</sup> Nemetva doarava manimani pethava nomba mendah lohynamoa. Wo Sesoana moamba os nilhana, ona indhanarini. Wo no indhanariniva himba Sesoai lohohra ahavna. <sup>2</sup> Himba doara di ahavna Sesoai, nonamba manimani lohynamoa. <sup>3</sup> Manimani henana sovena. Mana vemava indamonamba phonamoa. <sup>4</sup> Himba undna avna, wo noinda himba undnonoa daswolna indhanamba indkumbimba, snal ovna, woklava lavradaswolv. Nengam osm beswonam novvie. <sup>5</sup> Wo nomba woklava lavrapisahav sikulmonam. Wo simba owai, es eva hembra pilpikohavav.

### *Sesoa Yon Baptaism Wolaihaprana.*

<sup>6</sup> Doa Sesoa mongom indhanarinim wolaihaprana, nihilva Yon. <sup>7</sup> Himba prunna, ishunilm indhanam woklamom. Wo henamini indkumbiva woklamomba vavra, eva keknam undnahonam lovahthamnalm Kristusm. <sup>8</sup> Yonmba himba nomba woklava owai, heva os himba ambo ishunilm prunna indhanam woklamom.

### *Kristusva Petharamba Prona, Ona Wokla.*

<sup>9</sup> Hona woklava himba woklanonoo, wo himba honamba petharamba pronamba, indkumbim lovhueinna. <sup>10</sup> Himba hona pethara avna, noi ten hev tevenam, wo heva os pethanindva os

hemba liheinamoa. <sup>11</sup> Himba hevna petharam prona henga, wo heva os hevtindiva hemba patvmonanamoa, Yutanindva. <sup>12</sup> Wo heva os monglava hemba patvmonana. Himba keknam undnahonam lovahthamnavna hemba. Wo noinda hemba himba wolawona, alm Sesoana otovotalalm. <sup>13</sup> Himba nomba suvenamoa nisva araravalna tovolnamba Sesoana otovotalalmba. Nihna nengavnangrava, indhanana nengavnangrava owai. Sesoa hev suvena hevna otovotalalm.

<sup>14</sup> Honamba Sesoana moamba nilhana indhanarinielem, wo kamongo himba mongawulm aevulvna. Kava nunglimnivna hena pusambava, osm himba mongasal ombolva Sesoana arana. Hemba wolaihaprana petharam, wo hemba pilivhoawol lohwoyv, vei, wavrana eva moanonoana. <sup>15</sup> Doa Yon Baptaisva hemom ishona. Hev vevandnam moakus unnam, hehonam kava yemba doarava ishonna, osva mongova indhanariniva sisva si kamba pethapramnavav. Himba mendekli, henga kamba wohkuvhoav. Himba doara wohavna, kava sismini.

<sup>16</sup> Hemba nongapala vev wavrana eva moanonoana. Henaminiangas pimba indkumbiva elsus vrav esvemava awothowolva. <sup>17</sup> Sesoava doa holothunna lohohmomba pimba Mosesna englisra, heva os wavrana moanonoana provna Yesus Kristusnamini. <sup>18</sup> Indhanariniva doava mongova nonglanamoa Sesoamba. Heva os Sesoana mongal ombol murava av aralindava. Wo ombol novpa wohwuleihiniv pimba, osmba Sesoava snal av.

*Yon Baptisna Moa, Kava Manalm Lohv.**Matiu 3:1-12, Mak 1:7-8, Luk 3:15-17*

<sup>19</sup> Wo doa Yutanindna kuwulva Yerusalem-riniva wolamb vevna sembayang andranindm eva kokoldombnindm Yoninam, hem sah ovralm, osm, yimba manalm lohv?

<sup>20</sup> Yonmba wohishovna bambanam, himba komandhanamoa, hembra opla vrinilmba. Hev unna bambanam, kava Kristusva owai.

<sup>21</sup> Wo hev umnina, wo an hevpa eva yimba? Es hevpa yimba Elaitama, a? Hev unna, owai, kava Elaitava owai. Wo henga umnina, wo es hevpa yimba no moashulndrinima, noi ten piv nengvilivm? Hev unna, owai, kava nomba moashulndriniva owai. <sup>22</sup> Wo hev umnina, wo yimba manalm lohv? Eva kam ishunuta, osm ata kava os ishunvav, nomba temba himba kamba wolamb veiva. Es yimba oi pevmba? <sup>23</sup> Yon ondoht vinvna Aisaia moashulndrinina moam, Kana moalamangva os oi, indhanarini wunuho ov sahalpethara, os vueinghimnu monam beswonam mendeklim. *Aisaia 40:3*

<sup>24</sup> No Yutanindva, temba hembra wolamb venamba, monglava himba Varisinind. <sup>25</sup> Wo hev umnina Yonm, yimba os oima, kava owai Kristusva. Yimba os oima, owai kava Elaitava moashulndriniva. Yimba os oima, owai kava nomba moashulndriniva, ten piv nengvilivm? Wo manara eva yimba ponamba poswol vev indhanamba?

<sup>26</sup> Yon ophona, kava poswol vev indhanamba pona. Wo heva os mongo men yemongo lohvm, heva os owai, yimba lihevmoa hembra. <sup>27</sup> Himba noi, ten sis pethapramnavm kam. Kava mani

mendekli indhanarinima, osva kava pelvwol vevavra hena wemba spatoriniva. <sup>28</sup> Honamba manimani Yonmba di wonovowona Betani kembella, mongnamilm Yotan pora. Di ten Yon poswol vawovnam pona indhanam.

*Yesusva Sesoana Sipsip Otolmsna.*

<sup>29</sup> Wo mongnasimba Yonmba nonglanga vena, Yesusva ten prov kaendam. Hev unna, nunglu, sipsip otol Sesoana, he pethanindmba kilumbshuawol vev indkoklariniva. <sup>30</sup> Hem honamta, kava hemomba ishovna. Kava os ishovna, indhanariniva si sis kamba pethapramnavav, hevna andram velm. Heva os himba mendeklinonoa, kamba kuvhoav, manara, himba doara hesna avna, kava os lohna. <sup>31</sup> Seilva kava hembra lihanamo, wo os kava pronamba, indkumbim pona poswol vevna, osm pimba Israelnindva si lihevav hembra.

<sup>32-33</sup> Yonmba unna, kava lihavnamo, osva an hevpa Kristusva. Heva os Seso kamba wolaihaprana, poswolalm ponam. Wo Sesoava kamba ishomnana, yimba si nonglavav, kav-songolva holaperava, ovhoamnavra indhanariniinda. Wo hona indhanariniva Kristus, he si awothowol vevra Sesoasongolnanamba. Doa Yon henga ona, kava nonglana, Sesoasongolva holapevna senamini. Wo nomba Sesoasongolva snal ona, leumb, wo avna nihra Yesusinda. <sup>34</sup> Kava nonglana, honamba os vena. Wo kava osoa indhanamba ishuv, memba himba honamba ombolnonoa Sesoana.

*Seilmba Miva 4Pelara Saiyna Indhanamba  
Yesusna Aonghal Mahalnindilmba.*

<sup>35</sup> Wo mongnasiva Yon Baptaisva henga di wonlohvna hevna hellelnindrini samblam. <sup>36</sup> Himba wonnonglanga vena, ten Yesusva kohangav, wo unna, nunglu sipsip otolm Sesoanam. <sup>37</sup> Wo himba ehellena, ona, Yonmba os ov. Wo himba ehengva wulengavna Yesusmba.

<sup>38</sup> Wo Yesusva ona haravhoana, nongalna, men kam epawohamnav sis. Wo hev unna, manam yimba eslev? Hev ohophona, rapai, hi henalhra yimba alohv? (Rapaiva osm uv, guru.)

<sup>39</sup> Yesus opla vrinna, kam ambo ehengpro, ata yimba di enonglavav. Wo doa no indhanarini samblava os wohepawohamnana Yesusmba. Wo enonglana, nom deuvm, ten Yesus noinda alohvnam, wo osva nonamba himba di aevulna Yesusmongo. Nonamba doa okombava singvel vevna. <sup>40</sup> No indhanarini samblava, temba ehengva wulengavnamba Yesusmba, nonamba Yonmba ehellenamba, ona, Yonmba ishomnav Yesusm. No indhanarini samblava, mongova Endru, himba Simon Pitana boasalal.

<sup>41</sup> Wo boasna himba silelguana hevna boasalalmsna Simonm. Hev omnana Simonm, doa kava enonglai Mesaiamba. (Mesaiava osm uv, Kristus, temba Sesoava pusvundthoanamba.)

<sup>42</sup> Wo doa os Endruva Simonmba Yesusindamba waingana. Wo Yesusva nonglanamba Simonmba, wo omnana, yimba Simon, Yonna ombol. Yemba henga kava os awov, Sipas. Sipasva osm uv, Pita, memba elhonmsna av.

<sup>43</sup> Doa mongnasimba nengvna Yesusva, galm Galili provinsram. Himba boasna gana, Pilipm omnana, yeoa kam pethamno. <sup>44</sup> Pilippa himba

Betsaita kembellini lohvna, Endrui Yoni ten elohvnam nomini.

<sup>45</sup> Pilippa nonglanamba Natanielmba, wo omnana, nengo nom, Moses ten novol venam lohohmora, ona, indhanariniva si provav, wo eva moashulnindva hemomba novol vevol vina. Doa kava hembra nunglina. Himba Yesus, Yosepna ombol. Himba Nasaret kembellini.

<sup>46</sup> Wo Natanielva omnana Pilipmba, Nasaretma, wo es hevpa mana vema besal phovrama Nasaretriniva? Pilip ophona, prorava, nonglo. <sup>47</sup> Yesusva nonglana, Natanielva ten prov kaidam. Hev ona, hona indhanariniva memba Israelnindrininonoa. Moakokomomba owaimomolmba heindava kethalohvmoa.

<sup>48</sup> Wo Nataniel omnana, es hevpa yimba kamba osva lihei? Yesus ophona, kava yemba nonglai, yimba avna fiksingi, Pilippa yemba mendah ishomnimoa kamomba. <sup>49</sup> Wo Natanielva mengpoavna omnana Yesusmba, guru, yimba Sesoana ombolnonoa. Yimba king kuwul luhunv pina Israelnindnamba.

<sup>50</sup> Yesus omnana Natanielm, yimba undnahonam kamba lohmanav, noinda kava yemba ishomni, os kava yemba nonglai, yimba avna fiksingi. Tanam yimba si mana vemamba mendeklimba nongalvav pevna novna, honamba kuvhoavav. <sup>51</sup> Wo doa hev unna, kava tanam yemba ishunv, yimba si nunglivav, ovpa velaiha endvra. Wo yimba si nungeilvra, Sesoana ovsongolnindva si ahalapiha vevra yimondramsna kaidava, kava arana ombol lohv.

## 2

### *Onganung Vevna Diva Keina Kembellava.*

<sup>1</sup> Os sambla ninmba vewulnamba, diva onganung vevna Keina kembellava Galili provin-srava. Yesusna avalva di doara kusovna. <sup>2</sup> Eva Yesusmba hevtindinahonam doara das owol vina no onganungramba. <sup>3</sup> Wainpva hlipianamba, nomba diva novnangas viwul vevna, Yesusna aval ombolm omnana, himba wainpolva mon-gova wuleivvmoa.

<sup>4</sup> Yesus omnana, ava, manam yimba eva kamba omnav, kanamba nambaiva mendah provmoa, mendekliandrava velmba. <sup>5</sup> Wo avalva ishunyva andranindmba, yea nooa wohvinivm, himba temba yemba nomba unvrava, velmba. <sup>6</sup> Wo no deuvrava blekkumbiva diva indvlohvna 6pelara, osm pom ivsho vewolalm noindam. Yutanindva noinda hevm poswolalm, osm hevna wevolm engivra. Mendeklikumbi indvlohvna, pomba os lungundv, velohlohvna 100 lita. Honna vewol vina. <sup>7</sup> Yesus unna nom andranindm, ivsho vewol viu hona blekra. Wo himba sovhowol vivna, venamba, doa ambo sovhoral vungu vevna.

<sup>8-9</sup> Doa hev henga unna, wo henga mengellinioa veltharombol vivrava, doa tihna aralm wulangamno. Doa wulangamnanamba, wo hev bes nenamba, doara wainpolalm nilhana. Wo hev tit vena, hinimini vrei? Andranindva nonora lovahvna, temba himba pomba wulanganamba. Wo doa tihna aralva das ovra no angotalaim,

<sup>10</sup> wo hev omnana, memba wainpolva besalangas. Indhanana wevsava yimba engivmoa,

himba os vewol viv, himba boasna wainpova besal moang vi, wo sismba indhanamba mindnam hlapiarava, himba wainpova sahoklalva moang vi. Heva os yimba owai, yimba doara komandhai besalva wainpova, wo daipota men yimba wulprov.

<sup>11</sup> Memba Yesus seilnovra vena hevna mendekliandramba, himba di Keina kembella vena Galili provinsra. Di himba hevna pusambakambamba novpa wuleihinna, osm ora kekнасowol wohlohv. Wo hevtindiva os hembra undnahonamba kek-namba lohvhoadpramnana. <sup>12</sup> Nonamba Yesusva wonsihavnamba Kapaniam kembellamba nomba avalm, towandaslalm, hevtindim hevnam. Wo himba ambo uvsimbaihana diva Kapaniamba.

*Yesusva Engalungu Vena Tempelmerini Indhanamba, Nomba Temba Himba Bisnisandrava Vivnamba Diva.*

*Matiu 21:12-13, Mak 11:15-17, Luk 19:45-46*

<sup>13</sup> Wo nonamba doa mumra vinvna Yutanindnamba mendekliva tihva Pasovatihva. Wo Yesusva Yerusalemramba gavna. <sup>14</sup> Wo di peilla tempelduvrava himba ona nongalna, indhanamba men esvowolv sapina sipsipna tuawana leumbtuwana. Monglamba nongalna, himba hevna meyara aevluwul vevna, sembayangnindna diva dumbuluhunvna, wo tempelna diva dembrehunvna hembra.

<sup>15</sup> Doa Yesusva saong vranamba, nona di esvema vinvna sapina sipsipnam manam manam, wolapho velm. Wo osoa phona, meyam mulgothunnamba, diva nomba opihalohvna petharam, temba among vevnamba esesmba. <sup>16</sup> Wo hev



unna, nomba temba leumbtuwava esvowolv-namba, wonpulvo honaoa lelnam honaminioa, hengava manam yimba hulvui iambvav, wo kana arana deuvm maketduvulm vrivm.

<sup>17</sup> Hevtindiva nunglinamba, nomba temba himba vinvnamba hembra, himba henga ningvna, nom ten novol velohvnam Sesoana doaramini tombaimora,

Sesoa, deuvoa yenaoo ambo povawinvra indhanam, os kanamba undva suwemsna vuvrev.

*Buk Song*

**69:9**

<sup>18</sup> Wo Yutanindna kuwul umnina Yesusm, kana novra boasna vintok mendekliandra. Nonglalm, osm ora, yimba lehra tempelduvmba ovuni.

<sup>19</sup> Wo Yesus unna, tetga viu hona tempelduvm, kava si henga vevav samblamong okombanam.

<sup>20</sup> Yutanind opulvona, yimba gekala ov, indhanamba vina 46pelara tahonmba, vinamba hona tempelduvpa. Wo tanam yimba nengvma, osva kava vevav hengava samblamong okombanam?

<sup>21</sup> Heva os tempelmba, Yesusva ambo olhmona olhinvna hevna nihm. <sup>22</sup> Sism hev ten phonam pokamarini, hevtindiva ningvna, nomba Yesusva os ona. Wo noinda himba kek vithivna doaramini tombaimomba, eva moam, nom Yesus ten ishovanam.

<sup>23</sup> Yesusva di avna Yerusalemra, nomba mendekli tihva phunvnamba Yutanindnamba. Indkumbiva indhanamba hembra keknam undnahonam lovahthamnavna, noinda himba hevna novna nunglivnam, mendekliandra hev vevnam.

<sup>24</sup> Heva os Yesusva hembra ninginvnamoa, osva lehra kalmangas,

manara noinda himba lihawol vinvna hena nengavnangmba. <sup>25</sup> Himba nengvnamoa, osmba mongo indhanarini ishomnara kamao indhanamomoa. Manara, Yesusva hevpa lihawol vinvna indhanana nengavnangmba.

### 3

#### *Yesusva Waiishovna Nikotemus.*

<sup>1</sup> Mongo indhanarini lohvna, nihilva henamba Nikotemus, himba Varisinindrini. Wo himba mongo mendekli kuwul wulluhunvna Yutanindna. <sup>2</sup> Sinimba Nikotemusva provna Yesusindam. Hev omnana, guru, kava nonora lohv, osva yimba guru pronna Sesoanamini. An eva mongova vevav mendekliandrava, osva yimba memba vevpa, heva os Sesoa hev waivevra hembra.

<sup>3</sup> Yesus omnana, lehra yimba ov, heva os kava tanam yemba ishomnav. Indhanariniva hengava nemelalmba lohmba owai vetava, himba nomba osva sihavavmoa Sesoana nemeltindirava. Oi, aval henga hembra lenge. <sup>4</sup> Wo Nikotemus ophona, wo es hevpa, osva indhanariniva mundkolal, wo hengava hembra lingvav? Himba es eva sihavav hengava avalna emerava, osmba henga sleiha sism?

<sup>5</sup> Yesus omnana, kava ishomnav yemba tanam. Indhanariniva owai vetava, nemelalmba loholmba pona eva Sesoa songolnanamba, himba nomba osva sihavavmoa Sesoana nemeltindirava. <sup>6</sup> Nomba temba nihnamba nengandvripva, temba nihna. Wo nomba Sesoasongolnanamba phovpa, temba und nemel Sesoanamini. <sup>7</sup> Ata ye muembta

angaviluhvav, memba kava yemba ishomnavpa, yeoa indkumbimoa henga nemelalm nilhapro.

<sup>8</sup> Nengo, vuviva dalohvpa nosis nosis hevna nengavnangna. Yimba hellev, vuvi olv. Wo heva os yimba tit vev, vuviva henamini prov, hem hengava gav? Eva Sesoasongolva osta, himba indhanamba temba nemelalmba vinvpa.

<sup>9</sup> Nikotemusva os osahmanavna, honamba osva es hevpa, osva vevav? <sup>10</sup> Yesus omnana, yimba mendekli guru luhunv Israelnindna. Wo heva os owai, yimba mendah levrapirovngovmoa honamba? <sup>11</sup> Kava ishomnav yemba tanam. Kava ishuv, kav ten nonora avm. Kava ishuv, nom kav ten nunglinam. Wo heva os yimba nomba vreinama, temba nomba kava ishuniva yemba. <sup>12</sup> Kava ishunvna yemba manam manam hona petharinim, wo heva os yimba kamba hillivnama. Wo eva osta, yimba ata kamba hillivavmoa, kava yemba manam manam ishunvrava senaminimba Sesoaminiva.

<sup>13</sup> Manara, owai, indanamba mongova indhanariniva vonganamo Sesoaindamba. Kava arana ombol lohv. Arana ombolangas, hengas nominiva venamba, os holapena. <sup>14</sup> Yimba nonora av, nemetva Mosesva wikleihana tira sena saiholamsnamba, nonam di sahal pethara aevulvnam. Eva osta arana ombolva. Arana ombolmba eva osta wikleihivav. <sup>15</sup> Wo indkumbiva himba nomba undnahonamba lovahthamnavrava, himba nomba si wohavav yunalmangas.

<sup>16</sup> Manara, Sesoava mindnam und vewol vena indhanam hona pethanindm, wo noinda hevna mongal ombolm wolaihaprana hom. Wo himba

nomba ombolmba keknamba undnahonamba lovahthamnavrava, himba si sewonamba owolakovvavmoa, heva os wohavav yunalm. <sup>17</sup> Sesoava wolaihapranamo a hevna ombolmba petharamba, lesvhoawol velmba pethanindmba, heva lopshalm pethanindm hevnanam. <sup>18</sup> Noinde himba nomba keknamba undnahonamba lohmanavrava Sesoana ombolmba, si hembra nomba omnavavmoa, os yimba doa owolakohai. Heva os himba nomba keknamba lohmanamba owai venatava, doa himba owolakohai. Manara, himba Sesoana mongal ombolm undnahonam lohmanavmoa.

<sup>19</sup> Men plalvata, honana indhanamba doa owolakovv. Kava woklasnamba Sesoanaminiva doa prunna pethanindm. Wo heva os pethanindva und vivmoa hona woklamba. Himba und viv sim, noinda himba vivpa sahoklalm manam manam. <sup>20</sup> Indkumbiva himba nomba temba sahonamba vivpa, himba ovuv woklamba. Himba si provavmoa woklaramba, noinda si homeis ambara vethamnavm manam manam nom sahoklalm, ten hev vevm. <sup>21</sup> Wo heva os henomba engvrava moanonoamba, woklakambara aevulv, Sesoana moarava kava vewol viv, woklakowa lehra lovhoaku vinv.

*Yon Baptais Moakus Unna, Yesusna Nihiloa Mendekli Lohra.*

<sup>22</sup> Doa venamba, Yesusva wongavna hevtindimba Yutia provinsnahalm. Wo di Yesusva wonavnamba hevtindimba, pona poswol vavovna indhanamba. <sup>23</sup> Eva Yonmba di pona poswol vavovnata Ainonda murapeta Salimda, manara noinda diva mindnam

pomba lungu vevna. Indhanamba ahui vevna, domba gawolmba, pona posvralmba. <sup>24</sup> Memba nonam, mendah Yonmba buimeramba wolaihasuvnamoa.

<sup>25</sup> Mongla Yon Baptaisna hellelnind waialhuvna mongom Yutanindrinim, noinda Yutanindna hevna wevsa, hevm pona poswolalm. <sup>26</sup> Wo hev ambanamba Yonindam, umnina, guru, nengmano indhanarinim, nom ye ten nemet oholohnam mongnamilm Yotan pora, ten pev hemom ishomana vinvnam, osm ora, himba Kristus lohv. Himba pona poswol vavov, wo indhanamba ten heindamba ahui vev, gawovpa, ponamba poswolalmba heindamba.

<sup>27</sup> Yon unna, lehra Yesusva nomba temba vevpa osva, manara, Sesoana aralna nengavnangra nomba temba phov. <sup>28</sup> Yimba pevpa kamba hella vrivna, ovna, os ishov, kava Kristusva owai. Kava ambo noi, Sesoa kamba wolaihaprana, monam kokolma vremnalm hem. <sup>29</sup> Memba osm, mongova indhanariniva ongamba vravpa, wo no ungevlinirivna no tendorinina. Wo hena sehelva ambo aongmangas vev no angotalaina moamba, hellengas wohvev. Wo kava eva osta, kava honi mongal undva wulluhmanav Kristusmba. Wo doa osva kamba undnahonam wohkanandhai. <sup>30</sup> Henaoa nihiloa mendekli senaoa wohlohra, kamo a kuvhoara he.

*Yesusva Noi, Ten Pronam Senamini.*

<sup>31</sup> Himba nomba temba pronamba senaminiva, mendeklinonoa, manam manam wohkuvhoawol vev. Indhanariniva hona pethariniva, himba honamangas engv, himba petharinimangas

ishunv, nom manam manam ten lohvm pethara. Wo heva os himba nomba temba pronamba senaminiva, he mendeklinonoava luhunv manana manana. <sup>32</sup> Himba ishunvra, nom hev ten vena, nonglanam, eva hellevnam, heva os owai, mongova ovrana moa, nomba temba ishovnamba himba. <sup>33</sup> Heva os mongova indhanariniva himba nomba vravrava, nomba temba himba ishunvpa, doa vilipivongoi, osva Sesoava tanamolnam ishov. <sup>34</sup> Sesoava hevna ombolmba wolaihaprana, wo himba ishunvna manam manam pimba, nom Sesoava ten ishonam. Manara, Sesoava hembra pemila vrena mindnam hevsongolnanamba.

<sup>35</sup> Manara, aralva und vev mindnam ombolmba, wo himba moalamangva kovoraohna, kuwulm wulluhunilm, nonam manimani memba lohvpa. <sup>36</sup> Himba nomba keknamba lohmanavrava ombolmba, himba nomba si yunalm avav. Wo heva os himba nomba hellemba owai vevrava ombolmba, si himba yunalmba almba owolakovvav. Wo Sesoava wusprolva luhunvra heinda, daipota verava, sewonam.

## 4

### *Yesusva Ihishovna Samariaongorinii, Ungundongorinii.*

<sup>1</sup> Varisinindva ahalovna, ona, Yesusva mindnam pona poswol vev indhanamba hevtindimba, wo hena henga kuvhoawol vev Yon Baptaismba. <sup>2</sup> Heva os owai tanamba, Yesusva ponamba poswol vevnama indhanamba. Hevtindi poswol vivna. <sup>3</sup> Wo Yesusva doara nonora lohva, osva

Varisinindva doa hillina kanamba. Wo himba nominiva venamba Yutia provinsriniva, henga gana Galili provinsram. <sup>4</sup> Wo monamba himba gavnamba, himba Samaria provinshovmonam gavna.

<sup>5</sup> Diva Yesusva ganamba, mongona kembella pho, os sevre vrivna, Sikar. Nomba kembelva di mura lohvna ten petha, noi Yakop kovo-raohnam hevna ombolm Yosepm nemet doara. <sup>6</sup> Yakopnamba tovalpva di nolhra lohvna. Yesusva ganamba, kemongla uwit vilomnanamba, di dawonam eha vawovna, no tovalp popethalla. Wo nonamba doa okombava hovrahovra lohvna.

<sup>7</sup> Samaria ongoriniva provna, tovalpm vralm. Yesus omnana hembra, ai, kam vraho po, ka nei. <sup>8</sup> Memba honamba nonam vena, hevtin-diva di mendah kembella inne esvowolahavna wowonam. <sup>9</sup> Wo no ungevllirini ophona, kava nihvavk vei, osra yimba kam osahmanavna pom. Wo es hevpa osva yimba Yutanindrini, eva kava Samaria ongorini? Himba noinda osva ona, Yutanindva sesehnamba ahavmoa Samarianind-mongova.

<sup>10</sup> Yesus omnana, yimba mendah tit vev, nomba manimani Sesoava nis ambo daswolpva. Wo eva yimba tit vevnata, osva an yemba osahmanavna pomba. Yimba doarava lihatava, yimba ata osahmanata kamba, wo ata kava vraohta pomba yemba, noi yunalm nonapopolm alm.

<sup>11</sup> Wo ungevllirini omnana, wo hinimini yimba ata pomba vravav, nonapopolmba yunalmba almba? Tovalpva eva mani huimura livma, wo eva yimba mana vemava wulluhvmoa, nonamba

veltha vralmba. <sup>12</sup> Wo es hevpa ye mendekliva lohvma Yakopnamba, pina simbelnamba? Himba kamba vraohna hona tovalpva. Himba nawovna hevpa honamini. Eva hevna ombtowondalva deuvtatava hlavna honamini.

<sup>13</sup> Yesus ophona, indkumbiva himba nomba hlavrava honamba pomba, si henga hembra peha vinvra. <sup>14</sup> Wo heva os himba nomba nevrava pomba, nomba kava temba daswolvrava, si hembra hengava pehava vinvramoa. Wo pomba honamba kava daohvpa, si nilhavav puthovhoal-pomsna, hena nihmerava livra. Manara, kava si hembra undva vraohvav, nonapopolm yunalm wohalm.

<sup>15</sup> Wo no ungevhirini omnana, vraho kam honi po. Osm si homeis henga kam peha venavm. Wo kava si henga homeis provm hom, vralm pom.

<sup>16</sup> Wo doa Yesus omnana, gao, omnakao pevna tlapevm, wo waipro hom. <sup>17</sup> Wo no ungevhirini ophona, owai, kava tlahui av. Yesus omnana hembra, yimba lehra oi, osva kava av tlahui.

<sup>18</sup> Heva os es eva yenamba tlalva 5pelarava lo-vahvna. Wo memba daipotava yimba hona indhanariniiva ahavpa, yenamba tlalva owai. Yimba kamba honamba tanam wohishomni.

<sup>19</sup> Wo no ungevhirini omnana, kava os nonglav yemba, os yimba mongo moashulnindrini Sesoana. <sup>20</sup> Kana simbehumunmba sembayang velvohvna hona olora Samariara. Wo heva os yimba Yutanind owai, yimba os undva wulaevvna, diangas Yerusalemrangas heva lehrava indhanamba Sesoamba sembayang vewuvmonav.



<sup>21</sup> Yesus omnana, kam hello, doa nambaiva mumra prov, nonamba indhanamba si atonglavavmoa, osva vevra, Yerusalemram, eva hona Samaria olorava, sembayang vevuvmonalmba kana aramba. Owai, si vavawonam sembayangmba vilangavra.

<sup>22</sup> Yimba Samarianindva nom sembayang vevuvmona velvohinvna Sesoam, nom ten pev tit vrivm. Wo heva os kava Yutanindva liheivna Sesoamba, nomba kava temba sembayang vinivnamba. Manara, honamba moamba, memba Sesoava indhanamba lopshavpa monakoklariniva, moamba honamba ka Yutanind eishoraohv.

<sup>23</sup> Wo heva os nambaiva doa mura vev, nonamba osmba sembayangnindnonoava si sembayang vinivra aram Sesoasongolnapopol eva moanonoana wevsana. Doa phoi, noinda honam snam sembayangmba, aramba undva vev.

<sup>24</sup> Manara, Sesoava ivtovol nihilhui. Noinda hindva nomba temba sembayang vinivpa Sesoamba, heoa sembayang vivra Sesoasongolnapopol eva moanonoana wevsana.

<sup>25</sup> Wo henga ungevlirini omnana, kava nonora av, osva Mesaiava si provav. (Mesaiava osm uy, Kristus.) Nonamba Mesaiava si provavpa, himba si temura ishunvra manam manam pimba.

<sup>26</sup> Wo Yesus omnana, kata, kava men yemba ishomnav.

<sup>27</sup> Yesusva ona mendah ishona, hevtindi ambna kembellini. Wo himba evekingil vithina, noinda himba nunglivna, Yesusva waiisholohv ungevlirininim. Wo heva os mongova hevtindiriniva osahmanavnamoa, osva manam yimba vev?, manaram yimba waiishov hembra?

<sup>28</sup> Wo nomba ungevliriniva sumbva di pelehavna, hevpa henga gavna kembellam. Hev ganamba, unnam nom tendona onganam, <sup>29</sup> indhanarini ishomniva kam, osva owai, mani eva shalohoi, nomba temba kava vaomana vevnamba. Prapiao, angarava, nungli. Es heva Kristusmi? <sup>30</sup> Wo indhanamba kembelnindva hulom awona, angavna, nonglalm Yesusm.

<sup>31</sup> Nonamba no ungevliriniva tukvihavnamba, wo hevtindi umnina, guru, neo boasna. <sup>32</sup> Wo heva os Yesus unna, kava iav innemba, nelmba, nomba yimba levrapivolvmoa. <sup>33</sup> Wo hevtindiva hevm asahmana ungu vevna, es hevpa, mongova doarava ipromnaima Yesusmba innemba?

<sup>34</sup> Doa Yesus unna, kanamba innemba, nom velm, henoi ten hom kam wolaihapanam, manam manam henam velm. Kanamba innemba, lelnam vipialm andram, nom hev ten vraohnam kam velm. <sup>35</sup> Yimba os olvohv, weisva mendah samblasambla lovahv, innesrava si os avav nonam. Heva os yem ka ishunv, pevna aong lelahao, keknam mumuvul veo osonnam, doa osonnava nihilangas lohprav.

<sup>36</sup> Eva daipotava, indhanariniva nomba temba sevrava osonnamba, hembra doa diva dembrahunv. Himba osonnamba huhul vev, nonam yunalm wohalm. Wo noinda daipotava heoa indk evethavra, vei ten wolanam, eva henoi ten sevm. <sup>37</sup> Memba tanam, nonamba pivva uvpa osva, mongo indhanarini wolangav miva, wo heva os mongnindrini seprav sisva osonnava. <sup>38</sup> Kava yemba wolanga vungu vena, aiselm osonnam, nom diva yimba andra vinamoa.

Mongnind andra vina, wo yimba ambo hena andrara dumbunvra mindnam hengava.

<sup>39</sup> Wo doa nomba Samarianindva tendona onkana keknam lovahthamnavna undnahonam Yesusmba. Himba undnahonamba av, noinda nom ten ungevlini ishunnam, hev unna, himba wohishoi temura kanamba, nomba nemetva temba kava vevnamba. <sup>40</sup> Wo Samarianindva prapiavna Yesusindamba, ishumnivna mindnam, wonalm hevm. Wo himba noinda vewolna samblaninmba diva. <sup>41</sup> Wo doa esvema ambo lovahthamnavna undnahonamba, noinda manam manam hev ten ishunvnam.

<sup>42</sup> Wo hev umnina no ungevlinim, seilmba kava undnahonam lovahthamnavna Yesusmba, noinda ye kam nom ishunnam. Wo heva os daipotava kava keknam av undnahonam, noinda kava kav hilliva. Kava nonora av, os men hona indhanarinita, hengamba indhanam lopshalmba pethanindmba.

*Yesusva Sishona Vremnana Kuwulna Otolm.*

<sup>43</sup> Nomba samblaninmba vewolnamba, sismba Yesusva nominiva venamba, gavna Galili provinsram. <sup>44</sup> Manara, Yesusva doara ona, nemetva os moashulnindrinimba hevna kembelnindva beswonamba longong vrivmoa.

<sup>45</sup> Nonamba Yesusva phonamba Galilirava, wo diva indhanamba hembra windemona ohul vrivna. Himba doara ambnata eva no mendekli tihramba Yerusalemrava, wo diva himba doa nungeilna Yesusna mendekliandramba.

<sup>46</sup> Yesusva henga nungsis velm gavna Keina kembellam Galiliram. Men huita doarava Yesusva weihaloh vrena pomba wainpolalmba.

Doa nonamba mongo kuwul himba di avna Kapaniam kotara. Himba king kuwulna andranindrini, wo hena ombolmba uvavul venavna. <sup>47</sup> Wo no kuwulva hellena, ona, Yesusva doa prona Yutia provinsriniva, men av daipotava hui Galili provinsra. Wo himba gamnavna, Yesusm yinavana ovralm hem, prolm Kapaniamram, wo sishona vrelm ombolm. Otolva doa murapeta dahapiav.

<sup>48</sup> Yesus omnana, yimba hona indhanamba ambo osm viv, boasna kava heva nunglivrava mendekliandramba kavna novna, wo os heva kava undnahonamba lovahthamnavra hembra. <sup>49</sup> Wo no kuwul omnana, guru, lelnam pro, ata homeis lelnam otolm kana dahavm. <sup>50</sup> Yesus ophona, gao, otolva ata yenamba beswonam avav. Wo no kuwulva wohkek vethana, nom ten Yesus ishomnanam, wo os gana deuvramba.

<sup>51</sup> Wo monaram hevna andranindva ambvna, anongla venamba. Hev umnina, yenamba ombpevpa doa beswonam av. <sup>52</sup> Wo hev sah owol vevna, unna, wo henanam hevpa okombava hi lohvna, os kana ombva kanandhana? Hev umnina, okombava mara koho lohvhonama ambo, os nihvuvrava hembra wuleihana. <sup>53</sup> Wo aralva nengna, okombava nonamba koho lohvhonamba, nonamba Yesusva osva onamba, yenamba ombpevpa ata henga kanandhavav. Wo doa vena, no indhanarini, eva noi ten avna hena deuvra, himba doa Yesusmba keknam undnahonam lovahthamnana. <sup>54</sup> Memba honamba mendekliandrava Yesusva hengava sismba venamba, himba Yutia provinsrini pronamba, Galili provinsra avnamba, os vena.

## 5

### *Yesusva Mongom Monglamungilm Sishona Vrena.*

<sup>1</sup> Wo sismba Yesusva gavna Yerusalemba, Yutanindna mendekli tihram. <sup>2</sup> Wo diva Yerusalemrava doara mongova tovalpva livna, wo ovavholmba vuhemba 5pelara vewol velohvna tovalpsisva. Wo Hiprumonamba os sevriy, Betesta. Wo nomba tovalpva di mura livna kotapultuvrava, os ningthiv sipsipna tuv.

<sup>3-4</sup> Uvavulumungilnindva ovna mana ema vendholahola vev no ovavhollava diva tovalpsisva. Monglava novtitmungil, monglava monglakoklana, monglava kemindina. <sup>5</sup> Wo nomba uvavulnindva, doara di mongova vendholotholohvna ovavholla, himba uvavulmba os dihelomana vena, venamba, tahonmba ambo os lohmanavna 38pelara.

<sup>6</sup> Yesusva nonglanamba no indhanarinimba, wo nengna, himba noi ambo doaramini snan-gas wohvindilv. Wo doa venamba, Yesus osah-mana, es hevpa, yimba os nengvma, kamo a henga kanandhara? <sup>7</sup> Wo no uvavulumungilnindrini ophona, eye, heva os owai, an eva ata kamba aiv vindilpihavta tovalpmeramba, nonamba pomba punivtiva vevnamba? Kava lehlohvna, osm kasna mi kaoa pihai pomeraoa. Wo heva os non-amba kava lehlohvnamba, owai, monglava indhanamba kamba aiv vreipra vrelvohvna sism.

<sup>8</sup> Wo doa Yesus omnana, phorava, undund lohvhao. Pevna vuhesal dombrava, gao. <sup>9</sup> Wo nungi lelnam ambo hembra wohlesvhoana. Wo himba hevna vuhesal dombnamba, os gana.

Hona okombanamba manimani himba memba vevnamba, vah iaevul okombanam.

<sup>10</sup> Wo Yutanindva umnina no indhanarinimba, temba Yesusva sishona vrenamba, detiva vah iaevul okombanamba, aembu, ata ye pevna vuhesal ingavav deti, yimba pivnam lohohmom pilpikohav memba osva. <sup>11</sup> Wo heva os hev unna, indhanariniva temba kamba hengamba sishona vreiva, omni kamba, os dombrava pevna vuhesal, gao. <sup>12</sup> Wo hev osihminina, wo an no indhanariniva, temba yemba wuhhoiva, dombolmba pevna vuhesalva, ivohalmba? <sup>13</sup> Wo heva os no indhanariniva, himba tit venavna, osva an dihi himba. Manara, indhanamba no kembellava novpa es eva ata piasovta, wo nokulmonam Yesusva dasvovhoana nominiva.

<sup>14</sup> Wo sism henga Yesusva no indhanarinimba ona nonglana, men av tempelmera. Wo hev omnana, hello, yemba doa wohkanandhana. Wo hengava manam yimba sahonamba vevav, osra si mana vemava mendekli nonglaphovav yemba. <sup>15</sup> Wo no indhanariniva phonamba, ga, owalm Yutanindm yih. Hev unna, noita Yesusva, ten sishona vrenam kam.

<sup>16</sup> Yesusva vena honamba vah iaevul okombanam. Wo noinda Yutanindna kuwulva sahonam venalm vinivna hembra. <sup>17</sup> Wo heva os hev unna, kanamba aramba wuleihanamoanandra. Wo kava eva os andra vevta. <sup>18</sup> Wo hona moamba nomba Yutanindna kuwulmba otuhtuvna, himba keknam lihvna, helvakomandhalmangas Yesusmba. Hev una, seilmba lohohmomba vah iaevullinim pilpikohana. Wo hev vena, os ona, Sesoava hena aralnonoa. Wo os

himba hevmba os vrev, kava lohohra Sesoaiva elohv.

*Yesusva Wulluhvna Moalamangva Sesoana.*

<sup>19</sup> Yesus kuwulmba nomba opla vrinna, kava ishunv yemba tanam. Ombolva mana vemava vevavmoa hevna nengavnangnamba. Ombolva vev nongas, ten hev nonglavm, nom aral vevm. Ombolva nomba temba vevpa, aralva eva nomba vevta. <sup>20</sup> Aralva mindnam und vev ombolmba, wo aralva novpa wolaihamnav ombolmba, noindava manimani himba hevpa temba vevpa. Wo heva os aralva si novpa wolaihamnavav ombolmba manam manam mendeklim, honamba kana mendekliandramba henga kuvhueivra. Wo yimba indkumbiva si evekingil vruwul vevra.

<sup>21</sup> Aramba wolapho vewol vev indhanamba, nomba temba dalvpa, wo undnonoava henga daswolv hembra. Wo eva osta ombolva daswolv undva, nomba temba hevpa ninginvpa hembra. <sup>22</sup> Wo eva aramba lesvhoawol vevmoa indhanamba. Wo heva os aralva doa ombolm moalamangva kovoraohna, indhanamba lesvhoawolalmba. <sup>23</sup> Sesoava honamba osm vena, indkumbiva indhanamba si longong vrivra ombolmba, os ten hev longong vrinvm aralm. Himba longong vremba owai vivrava ombolmba, eva aralmba longong vrivmoata, hem nomba temba ombolmba wolaihapranamba.

<sup>24</sup> Kava ishunv yemba tanam. Himba nomba hillivrava, nomba temba kava ishovrava, wo undnahonamba lovahthamnavrava hembra, nomba temba kamba wolaihapranamba, himba si beswonam avav yunalm. Hembra si

lesvhoawol vivavmoa, osva ora, himba indkokla vivna. Heva os himba doa doara wuleihina dahalmba, wo saivna, alm yunalm daipotava.

<sup>25</sup> Kava ishunv yemba tanam. Doa nambaiva mura vev, wo doa phona, indhanamba temba sihanamba, himba si hillivra moalamangmba Sesoana ombolnamba. Wo himba nomba si hillivrava, himba si undna beswonam avav.

<sup>26</sup> Undva nonapopolmba almba, phov aranamini hevnamini. Wo aralva wolaihana ombolm, osva henamini vravra, undva nonapopolmba almba.

<sup>27</sup> Wo aralva vraohna ombolmba moalamangva, lesvhoawolalm, noinda himba lohvna aralna ombol.

<sup>28</sup> Manam yimba nengavnangva vivra mindnamba honamba. Doa nambaiva mura vev, nonamba temba doarava hembra dalnamba, wo pokamara shav, si hillivra hena moalamangmba. <sup>29</sup> Wo himba si os phosohvra hevna pokamariniva. Wo nomba temba beswonamba himba vivnamba, si wolapho vevra, wo avra undnapopolm yunalm. Wo heva os himba temba sahonamba manimani vivnamba, hembra si wolapho vevra, lesvhoawolalm, osra doara doa yimba owolakovvna.

### *Yesusva Sesoana Ombol.*

<sup>30</sup> Yesusva mendah ishunvna Yutanindna kuwulm, kava es eva vevav mana vemava kavna nengavnangnamba, owai. Kava nomangas wohengv, ten kam omnanam velm hev, wo noinda kanamba lesvhoawolalmba lehra lohv. Manara, kava kavna nengavnangnamba vevmoa. Kava osm vev, heoa und lothora, temba himba kamba wolaihapranamba. <sup>31</sup> Kava kavhova yemba ishunilmba kavna andramba vevrava,



yimba si kek vithivramoa, nomba ishunvrava kava yemba. <sup>32</sup> Wo heva os ten mongova indhanariniva lohv, himba kamomba ishomana vinv. Wo kava nonora, nomba manam manam himba ishomana vevnamba kamomba, tanam. Memba kana ara.

<sup>33</sup> Yimba doara wolanga vivna indhanamba Yon Baptaisindam. Wo himba yemba ishunvna moanonoam kamom. <sup>34</sup> Kava mindnamba nengvmoa, osva Yon Baptaisva ishovra kamomba. Heva os kava ov honamba, osm yimba si kamba undnahonamba lovahthamnavrava, wo Sesoava yemba si lopshavav. <sup>35</sup> Yonmba sna lohvna, ovna, tav woklasowa. Wo yimba indkumbiva indk vithivna henambarava nonam.

<sup>36</sup> Wo heva os kanamba nethalmba noi mendekli, Yonna kamomba henga kuvhoav. Noi manimani mendekliandram, men kav vewol vevm, nom nethalmba nungliv. Memba manimani, noi ten ara kam dembraohnam velm. Noi mendekliandrara osva nungliv, ara kamba wolaihaprana. <sup>37</sup> Wo ara henoi, ten kam wolaihapranam, hev kamomba ishov. Heva os yimba es eva hillivav hena moamba. Wo yimba es eva nunglivav, osva ora, snal himba dihi av?

<sup>38</sup> Henamba moamba yimba kek vithivmoa, manara, yimba keknamba undnahonamba lovahthamnavmoa, nomba temba aramba wolaihapranamba hembra.

<sup>39</sup> Yimba temura beswonam levrapiivolalm viv tombaimomba doaraminim, manara, yimba os ningv, kamba daswolv, beswonam alm yunalm. Heva os nomba temba mongawa tombaimomba doaraminiva ishov kamom. <sup>40</sup> Heva os yimba

kongswil vev, ambalmba kaindamba, osalmba kaoa yunalm beswonam ai.

<sup>41</sup> Kava provmoa, osmba kana nihilmba wivivra. <sup>42</sup> Heva os kava yemba os nongalv, yimba Sesoamba undvivmoa. <sup>43</sup> Manara, kava prona kavna aranamini, kava hena moamba wulprona. Wo heva os yimba pevna undnahonamba kamba holvoreivmoa. Heva mongova indhanariniva provpa, wo himba ishovpa moamba, hevmangas ishov, wo yimba hembra holvoreiv.

<sup>44</sup> Yimba osm viv, kamo a okolowol vivra henoi henoi. Wo heva os yimba ningvmoa mindnamba, osm Sesoa kamo a okolowol vevra, himba temba mongal avpa. Wo es hevpa eva yimba undnahonamba lovahthamnavav kamba? <sup>45</sup> Manam yimba osva ningvav, kava si yemba ishunvav arana novra, osva yimba indkokla vivna. Moses si yemba wetat owol vevav, osva yimba indkoklava wohvivna. Wo yimba hem osva ningminiv, he si kamba wonolohvav. <sup>46</sup> Yimba tanamba keknamba undnahonamba Mosesmba amnatava, eva yimba kamba os amnavrata, manara noinda Mosesva novol vewol vena kamom. <sup>47</sup> Wo heva os yimba kek vithivmoa honamba, memba Mosesva novol vewol venamba. Wo noinda osva es eva yimba kek vithivav, nomba temba kava ishovpa.

## 6

*Indhanamba Mara Os Lohnama 5,000Pelara,  
Nomba Yesusva Dahwol Vevnamba Innemba.  
Matiu 14:13-21, Mak 6:30-44, Luk 9:10-17*

<sup>1</sup> Wo doa venamba, sismba himba gavna mongnahalmba Galili plombpethallam, ambo weihaloh vriv, vev, os sevriv, Galiliplomb,

eva Taiperiasplomb. <sup>2</sup> Indhanamba ahuiva vevna, hembra sismba telgalmba, noinda himba hevna novna nunglivnam mendekliandram, hev ten sishona vewol vevnam uvavulnindm.

<sup>3</sup> Doa mongnahal wonphonamba, olora wonvonganamba, di wonovhoa. <sup>4</sup> Wo nonamba doa Yutanindva ungemira ovhoapihavna, tih mendekli mumra vinvnamba, Pasovatih.

<sup>5</sup> Wo noinda Yesusva ona nov venga vena, indhanamba pomba ten kiheiv, os provna heindamangas dom. Hev omnana Pilipm, hi hevpa ata pivva innemba sovawol vivav, hona indhanamba dahwol velmba? <sup>6</sup> Himba ambo osm Pilipm lehvna, verava, ora os ov Pilipkova. Hevpa doara nengna, osmba ona, ata kava os vevav. <sup>7</sup> Wo Pilip ophona, owai, pivva heva boasna mongawawusnam diandrava vivav, di wulkusovav, esvemam rotim dombolm, osm indakondam singthalm hem ambo, osm eskand eskand.

<sup>8</sup> Mongova hevtindiriniva doara di lohvna Endru. Himba Simon Pitana boasalal. Endru ona, <sup>9</sup> men mongo tuendisrini ilohvpa 5pelara bali bretva, tambkova sambla. Wo heva os honamba ata lehra vethavavmoa sna indhanamba.

<sup>10</sup> Yesus unna, os ishunu hemoa, ovhoaprara. (Ilva vavawonam lohv temba diva, wo indhanamba diva avnamba, nomba os avna 5,000pelara.) <sup>11</sup> Wo doa Yesusva nomba bretva dombnamba, nehvongo ovomnavna Sesoam, yimba lehra, no bretna, wo doa os povmang viwul vinvna no indhanamba, temba avnamba ilsrava. Wo eva tambkova os venata. Himba os dahwol vena, venamba, doa mengva indkokla vilunvna henamba.

<sup>12</sup> Nonamba himba hlanamba, doa venamba, ambo lokovoko gavna, eva ata mana eram hengava uta, owai. Yesus unna hevtindim, eunumbuloa bretna tambkonaoa huhul viu, nooa temba nalohungu vevpa eunumbulva. Ata ye wuldiavav. <sup>13</sup> Wo himba vinamba, henga temura huhul vivna nomba eunumbulva, temba nalohungu vevnamba. Wo hengava songovranamba eunumbulva, 12pelara songoihalohna sumbrava nomba bretna tambkonamba.

<sup>14</sup> Wo indhanamba nonamba no mendekliandramba nunglinamba, temba Yesusva vevnamba, hev una, himba dihi tanamolnam nomba moashulnindriniva, temba Sesova wolaihapralmba onamba hona petharamba?

<sup>15</sup> Yesusva doara nonora lohvna, osva himba nengavnangva vrivna, kekel velm kam, waiangalm, aivol velm kam, king kuwulalm wulluhunilm hevnm. Wo noinda himba nominiva venamba, os henga gana hevho oloram.

*Yesusva Gavna Sena Posra.  
Matiu 14:22-33, Mak 6:45-52*

<sup>16</sup> Wo no okomba vohanamba Yesustindiva peivna Galiliplombram. <sup>17</sup> Wo doara wohkilvrana, wo heva os mendah Yesusva engalpravnamoa hembra. Hevtindiva botra vongopianamba, doa ahnam os hiliwelgivna Kapaniamram. <sup>18</sup> Wo vuviva snavema dalohvna, wo vuviva vevnamba, otuhhovna plombm, plombva ovram vongavna.

<sup>19</sup> Himba mara botva ambo os wulanganama 5pelami 6pelami kilomita tokwonamba. Wo himba ona nunglina, Yesusva ten posra sena prov botram murapetam. Wo hevtindiva pemba os

viwul vevna i. <sup>20</sup> Wo heva os Yesus hev unna, manapenam yimba viv? Memba ka. <sup>21</sup> Wo himba indk vithivna, wolaihavolalmba Yesusmba botramba. Wo nungi lelnam ambo pulvona, diva temba hevpa angavnamba domba.

*Indhanamba Avnamoa, Etapewolvna, Nonglalm Yesusm, Nomba Hevpa Temba Dahwol Venamba.*

<sup>22</sup> Wo venamba, mongnasiva nomba indhanamba di mendah wohaeuvlvna mongnamilm Galiplombnahalm, nomba temba Yesusva dahwol venamba innemba. Himba os ningvna, Yesusva dihi es vei, wongaimoa botrava hevtindimba, wo botva mongova owai. <sup>23</sup> Doa nonamba monglava Taiperiasrini botva pepira vei. Wo himba di pepavevna, ten nolhra hev inne mendekli hlanam. <sup>24</sup> Wo nomba indhanamba nunglina os, pai owai, Yesusva hevtindimba huiva wonlohvmoa. Wo himba nominiva vinamba, nomba botra vongopiengu venamba, angavna Kapaniam, aslaluvmona velm Yesusm.

*Yesusva Inne, Yunalm Wohalm Nokram Nonapopolm.*

<sup>25</sup> Wo himba nonglapulvonamba diva Yesusmba mongnamilva plombrava. Hev umnina, guru, henanam yimba homba prona? <sup>26</sup> Yesus unna, wo es hevpa yimba eva kam sah ambvma, noinda yimba kamba nunglina, kava mendekliandra vevna, wo yimba kam lovahthamnalm vevma? Owai, yemba kava tanam ishunv. Yimba sah ambvna ambo kam, noinda yimba bret hlanamba, os venamba, ambo lokovoko gavna. <sup>27</sup> Hillu, innemba

pethariniva lelnam ambo pindta vungav. Wo noinda osva manam yimba andra vivra, nomba innemba dombolmba. Heva os andra vivm, innem dombolm, nom nokrava si yimba yunalmba wohavra. Arana ombol si yemba daswolvra no innemba. Sesoava aramba doa ambara velahana, osva himba hevpa waiav nihra arana ombolmba.

<sup>28</sup> Wo no indhana umnina, manam Sesoava ninginv kamba, vinilmba? <sup>29</sup> Yesus unna, andrava Sesoava yemba ninginvpa, men honam, keknam undnahonam lovahthamnalm, nom ten Sesoa hev wolaihpranam hom. <sup>30</sup> Wo no indhana opulvona, mani mendekliandrava ata yimba vevav? Osm kava ata nunglivav nomba mendekliandrava, wo osva si kava yemba keknam undnahonamba lovahthamnavra. Ata es yimba vevav? <sup>31</sup> Manara, tomonalva pinamba innemba manava hlana sahal pethara. Os novol velohv doaramini tombaimorava, Sesoa daswolna innemba senamini hembra, hlalmba.

<sup>32</sup> Yesus unna, yemba kava ishunv tanam, owai Mosesva, temba pina simbehumunmba daswolnamba innemba senaminiva. Heva os kana ara vinna, wo daipotava himba yemba men daswolv innenonoava senaminiva. <sup>33</sup> Sesoana innemba, noi indhanarini, ten holvopenam senamini, wo henamini undnonoava vrav pethanindva huiva petharava.

<sup>34</sup> Wo indhana henga noi opulvona, guru, eva yeoa no inneoa kamoahawol vawota elsus. <sup>35</sup> Wo Yesus ophona, ka menta innemba, nomba nokrava yunalmba almba. Himba nomba homba sihavrava, hem nomba si ponmba ve-

navramoa hengava. Himba nomba keknamba lohmanavrava kamba, hembra nomba si hengava pehava venavramoa.

<sup>36</sup> Yemba doa seilva kava ishuni, wo eva yimba doa kamba nungli, wo heva os owai, yimba kamba amnavmoa keknamba. <sup>37</sup> Aramba indhanamba pethanindmba kamangas wohwolamnav. Wo indakonda himba si pepra vevra kaindamba, wo kava ambo hembra holvorombolangas vevra. <sup>38</sup> Kava holvopena senaminiva, velm nom, kam Sesoa nengmanavram, nom velm. Kava osmba pronamoa, vevra manimani ambo kavna nengav-nangna.

<sup>39</sup> Wo noinda osva kava mongova bumbrivavmoa, nomba temba Sesoava kamba wolamanamba, wo kava hembra si wolapho vevav, nonam ovi pethai hoai evewolvram, Sesoava indhanamba lesvhoawol vevav. Memba honamba, himba kamba wolaihapranamba, himba nengmanav kamba, velm osm. <sup>40</sup> Indkumbiva himba nomba temba nunglinamba ombolmba, wo keknamba amnavnamba hembra, himba nomba av yunalm. Kava si wolapho vevav, nonam ovi pethai hoai evewolvram. Men honam, osm kana aramba undva vrev.

<sup>41</sup> Wo doa Yutanindva eishomnavna mindnam Yesusmba. Himba eishovna noinda sahonamba, he os onamba, kava inne senamini venamba, holvopena petharam. <sup>42</sup> Himba hevm eishovna, memba himba Yesus. Pimba lihewulminiv aralimba avalimba henamba. Himba ambo Yosepna ombol. Wo es hevpa himba osva oi, kava holvopena senamini?

<sup>43</sup> Wo doa Yesus opla vrinna, beswonam ambo maivithu, ata ye kam sahonam ishumnivav.

<sup>44</sup> Ara kamba wolaihaprana. Anvema mongo provav kaimdam, heva os ara boasna hena nengavnangva tuhlohmanarava, wo os provra kaimdamba. Wo ovi pethaiva hoai evewolvra, si kava wolapho vevav hembra pokamariniva.

<sup>45</sup> Moamba men novol velohv moashulnindna tombaira. Sesoava si numhowol vevav indkumbimba indhanamba. Wo indkumbiva himba nomba hillivrava aramba, nowolva henaminiva dumbvrava, himba si kaimdam ambvra.

<sup>46</sup> Mongova doava aramba nonglanamo, henongas ten hanoi pronam aranamini. Hengas doava nonglana aramba. <sup>47</sup> Yemba kava tanam ishuv, himba nomba kamba keknamba undnahonamba amnatava, himba si avav yunalm. <sup>48</sup> Manara, kava inne, noi yimba yunalm wohavav nonapopolm.

<sup>49</sup> Pina simbehunmba temba innemba manava hlanamba sahal petharava, wo heva os doara doa hembra wohdalpiana. <sup>50</sup> Heva os kava memba inne, noi ten holvopenam senamini. Wo himba nomba netava honamba innemba, hembra nomba si dahavavmoa. <sup>51</sup> Kava inne, noi nonapopolm yunalm alm, holvopena senamini. Wo himba nomba nevrava hona innemba, himba si yunalm wohavra. Memba honamba innemba, kana kavna nihilnonoa. Kava si daswolvra kavna nihil, osm pethanindva si nonapopol avra.

<sup>52</sup> Wo nomba moamba Yutanindva ona hillina, wo hevm alhuvna. Hev uvnam, es hevpa hona indhanariniva si daswolvra hevna nihilva pimba,



hlalmba? <sup>53</sup> Wo henga Yesus unna, kava ishunv tanam yemba. Yeoa hlangas vevm arana ombolna nihiloa. Wo eva osoa hlamnavm hena tovoloa. Yimba honamba osmba owai vivrava, wo eva osva yimba si mananapopol wohavra yunalmba?

<sup>54</sup> Himba nomba kana nihilna tovolnamba hlavrava, himba nomba si wohaeuvlvra yunalm. Ovi pethaiva hoai evewolvrava, kava si hembra wolapho vungavav pokamariniva.

<sup>55</sup> Kana nihilva innenonoa. Kana tovolva pononoa. <sup>56</sup> Himba nomba nevrava kana nihilna tovolnamba, himba kanamera avra, wo eva kava heinda avra. <sup>57</sup> Ara kamba wolaihaprana. Ara avpa, wo kava eva avta, manara noinda arainda. Wo noinda osva himba nomba temba hlavpa kana nihilva, si aevulvra yunalm, manara noinda himba kana nihilmengna.

<sup>58</sup> Kava innemba snamba owai, temba pina sim-behumunmba hlanamba sahal petharava. Himba noi inne hlana, wo heva os hembra wohdalpiana yunalm. Kava no inne, ten holvopena senamini. Himba nomba nevrava hona innemba, si wohavra yunalm. <sup>59</sup> Yesusva ishunvna manam manam honamba, di hev ten numhowol vevnam sembayangduvra Kapaniam kembella.

*Memba Honamba Moamba, Yunalm Alm Moa.*

<sup>60</sup> Wo hevtindiva nomba Yesusnamba hillinamba honamba, monglava himba os uvna, hona moamba owai, mindnam kin vev. An hevpa eva hellevav ata? <sup>61</sup> Wo Yesusva lihawol vena, ona, himba moamba ishuv hona kana moara. Wo hev unna, es hevpa hona moamba yenamba undmba indkokla vevol vinima? <sup>62</sup> Wo eva indkokla vevol vevavma yemba, nonglalmba, nomba arana

ombolva hengava gavrava, domba temba hevpa nominiva pronamba? <sup>63</sup> Nihva indhanamba daswolvmoa undva, nonamba almaba. Owai, Sesoa-songol hev daswolv undva, nonamba almaba.

<sup>64</sup> Wo heva os yimba monglava keknamba avmoa. Yesusva lihawol vevna, osva ovna, himba honamba undnahonamba keknamba lohvmoa. Himba os lihawol vena, nemel mendah ten hev saivnam. Wo hev vena, doara nonglana, osva ona, hehoni si kamba indkoklava vrevav sewonamba.

<sup>65</sup> Yesus unna, yimba monglava keknamba avmoa, noindata osva kava ov, aramba indhanarinimba kamba wolaihamnamba owai venavrava, wo eva owaita, himba nomba provramoa kaindamba.

<sup>66</sup> Yesusva honamba moamba ishopianamba, mindnamba hevtindiva os dasva buona hembra. Os wohnombolvhueina, hengava hembra engvalvohmana vevnamoa. <sup>67</sup> Yesus osihinna no 12pelaram monglam hevtindim, wo es hevpa eva yimba angawulalm vevmata?

<sup>68</sup> Simon Pita omnana Yesusm, mendekli, henahalm ata kava angavav? Yimba wulluhv moamba, noi ten daswolvm und besal, nonam yunalm alm. <sup>69</sup> Kava yemba keknam undnahonam lovahmanav. Kava nonora, osva yimba nomba temba Sesoa onamba, wolaihapralmba.

<sup>70</sup> Wo Yesus ophona, lehra yimba ov, kava doa yemba 12pelara kiki vewol vena. Heva os mongova yeriniva Setanmsna lohv. <sup>71</sup> Yesusva ongamnavna Yutasm, Simon Iskariotna ombolm. Yutasva noi, mongo 12pelarini Yesustindirini lohva. Heva os sewonamba himba si Yesusmba

ungundna englara bumb vinvav, ungun dtatalm vendalm.

## 7

*Omollava Hevpa Yesusmba Undnahonamba Lovahthamnavnamoa.*

<sup>1</sup> Wo sismba nonamba Yesusva di lohmana vevna Galili provinsrangas. Himba galmba vevnamoa Yutia provinsramba, manara, Yutanindna kuwulva doa hembra muembnavho vrinamba, helvakomandhalm. <sup>2</sup> Wo nonamba doa Yutanindnamba tihva mendekliva kuksaduvriniva mumra vinvna. <sup>3</sup> Wo hevna towandaslal umnina, yeoa honaminioa verava, gao Yerusalemram tihram. Wo yetindiva di nunglivav, mendekliandrava yimba vevrava.

<sup>4</sup> Manara, himba nomba museramba loholmba vevpa, osmba annind annind kamo nonora amnavra, wo komavramoa, nomba hevpa temba manimani vevpa. Yimba honamba manam manam memba vevpa, pevm musera eva hulfundthueinuta annindm annindm. <sup>5</sup> Himba noinda osva ishumnivna, owaita, hevna towandaslalva hembra lovahthamnavnamoa keknamba undnahonamba.

<sup>6</sup> Wo Yesus unna hevna towandaslalmba, kanamba mendah prov. Heva os yimba angalmba vetava, ambo yepev ora men honanam. <sup>7</sup> Manara, annind annind pethanindva si yemba daosva wulambinramoa. Wo heva os kam vinivra, manara, kava ishunvpa nom manam sahoklalm, hev ten vivm. <sup>8</sup> Wou, doa yeoa angavm no tih mendekliramoa. Ata kava domba provavmoa. Nambainonoava mendah kanamba provmoa.

<sup>9</sup> Himba honamba hembra osva ishopieinnamba, himba hevho dawonam di wohana Galilira.

<sup>10</sup> Wo towandaslalva doa os gapiana no tih mendekliramba. Wo venamba, ona, doa wohgapi-ana, wo eva Yesusva ambo ketkoat hembra os petheinna sis. Wo heva os himba os vevna, diva ata indhanarini kam homeis lihavm mongo.

<sup>11</sup> Wo no tihrava Yutanindna kuwulva hembra di etapewulungu vevna, uvna, dihi es vei? Hev una, hi no indhanariniva av? <sup>12</sup> Wo indhanamba diva avnamba, owai, ambo missra holvodesvhoavna. Wo himba hevm eishovna. Monglava uvna, himba indhanarini besal lohv. Mongla uvna, owai, himba moam kokomana vinvpa indhanam.

<sup>13</sup> Wo heva os owai, an eva andralva ata bambanamba muserava osva ota? Manara, himba pem vinvna Yutanindna kuwulnapenam.

*Yesusva Di Tihmera Yumna Vewolnamba, Osoa Ambo Wohnumhowol Vevna.*

<sup>14</sup> Wo tihva doa hovrahovra vrivna. Wo Yesusva sihanamba tempelmera, wo osoa ambo numhowol wohvevna. <sup>15</sup> Wo Yutanindna kuwulva di evekingil vruwul vevna, hev una, hona indhanariniva owai, numha vrinamo, osva memba pimba, wo es hevpa himba nonorangasva lohv?

<sup>16</sup> Wo Yesus unna, manam manam memba kava yemba numhowol vevpa, owai kavnamba, kanamba moamba prov, henona ten henoi kam hom wolaihapranam. <sup>17</sup> Himba nomba mongova undva vretava, Sesoana moamba keknamba engalmba, wo himba osva levrapivongovav moana plalmba, honamba memba kava ishovpa, prov Sesoanamini. Wo himba si nonora lohvra

honamba moamba, osva memba kanamba owai.  
<sup>18</sup> Himba nomba numhowol vevrava hevna nengavnangnamba, himba ambo hevm osm temba vevra, kakowa lehra lohv. Wo heva os himba nomba venavrava, okolalmba hembra nomba, himba temba hembra wolaihapanamba, no indhanariniva ishov tanamolnam. Heindava mana vemava dasalmba lohvmoa.

<sup>19</sup> Mosesva doa lohohmomba yemba vrahunna, wo heva os yeriniva mongova nomba engvmoa lohohmomba. Wo manara yimba kamba helvakomandhalmba viv? <sup>20</sup> Wo indhana noi di avna, hev umnina louwolm, tihsongokokla yeindava nihrava sihaiva, noinda yimba memba osva daimora ishov. Kava helvakomandhalmba vivmoa yemba.

<sup>21</sup> Wo Yesus unna, kava vena mongal mendekliandrava vah iaevul okombanamba, wo yimba indkumbiva evekingil avramana vena. <sup>22</sup> Heva os yimba pevpa eva andrava vivta vah iaevul okombanamba. Manara, Mosesva doa yemba lohohmomba vrahunna, hutovmomba koalmba. Wo heva os honamba Mosesnamba owai. Hutovpa koalmba, pina pivna simbehumunna wevsa. Wo yimba noinda pevna otovotalnamba koalvuhinv vah iaevul okombanamba.

<sup>23</sup> Temba yimba osm vivna, otolnamba hutovpa kueinilmba vah iaevul okombanamba, wohengalm Mosesna lohohmom. Wo manara yimba eva kamba wusapramana venavna, kava nonamba vah iaevul okombanamba wohsishona vrevnamba mongomba indhanarinimba?

<sup>24</sup> Manam yimba pevna novnamba nisva kana

andramba lesvhueivav, yeoa pepthanam viuta, manam yimba seposamba vivav.

*Es Hevpa, Yesusva Kristus Lohvma?*

<sup>25</sup> Monglava indhanamba, nomba diva temba avnamba Yerusalemrava, hev una, hona indhanarinimta, dihi mundilva helvakomandhalmba vivnata? <sup>26</sup> Wo heva os himba numhowol vev men, wo indkumbiva vev, nungliv novna, eva hillivm aongna. Wo noinda osva an eva hembra ovomnavav, owai. Osm dihi mundilva os ningvna, himba tanam Kristus?

<sup>27</sup> Heva os kava nonora lovahv, nomini hona indhanariniva. Wo nonamba Kristusnonoava si provavpa, mongova indhanariniva si osva olhavavmoa, hinimini himba.

<sup>28</sup> Yesusva mendah di numhowol vevna tempelmera. Hev mindnam vevandnam unnam, tanamta, yimba kamba nonora amnav, wo eva yimba nonora av, osva henamini kava pronam. Wo heva os kava kavna nengavnangna pronamo. Kava pronam nona, henoi ten kam wolaihapranam, wo himba moanonoa ishov. Heva os yimba levrapivolvmoa hembra. <sup>29</sup> Heva os kava kavpa lihav hembra, noinda kava henamini, wo he kamba wolaihaprana.

<sup>30</sup> Henanam honamba moamba Yesusva ona wulihana, diva indhanamba nomba avnamba, himba kevrilm vivna hembra. Wo heva os owai, an eva ata englava piata. Manara, noinda henamba nambaiva murava provnamoa, kevrilm. <sup>31</sup> Wo heva os monglava hembra keknam undnahonam lovahthamnavna. Hev una, nonamba Kristusva si provavpa, si himba

mindnam mendekliandrava vevavma, os men hona indhanarini vevnam?

*Yutanindna Kuwulva Kevralm Vivna Buiram Yesusmba.*

<sup>32</sup> Varisinindva hilwilvna, ona, indhanamba os eishomnav Yesusmba, noindava manimani himba temba vevnamba. Wo doa vena, sembayang andranindna kuwul eva Varisinind, himba wolanga vivna tempelduvna polisimba, kevralm Yesusmba. <sup>33</sup> Wo Yesus unna, kava si yemba ambo wonasambaihavav, kava si henga gavav araindam. <sup>34</sup> Yimba si kamba aslaluwuvav, wo heva os yimba si kamba nunglivavmoa. Wo yimba ambvramoa domba, diva kava avrava.

<sup>35</sup> Wo Yutanindva hevmba os eishungu vevna, henahalm hevpa galm ov, wo noinda pivva si hembra asahlihavav? Si himba gavmi Griknindna kotaram, dom ten pivna owal eungu vinvm di? Si himba numhowolalm gavmi Griknindm dom?

<sup>36</sup> Wo hev oi, pivva si aslavra, wo heva os pivva si nunglivavmoa. Wo hev vei, os oi, yimba ambvramoa, diva kava avrava. Wo es hevpa memba osva oi?

*Yesusva Sesosongolmom Ishovna.*

<sup>37</sup> Muhuvhoavna nomba tih mendekliva doa eunillam. Doa Yesusva phonamba, hev mindnam vevandnam unna, yemba mongova snallava pehava venatava, heoa nooa prora kaindam. <sup>38</sup> Indhanariniva kamba keknamba undnahonamba lohmanatava, pomba nonapopolva avpa, si ongovra hena undrini. Os novol velohv tombaimorava.

<sup>39</sup> Yesusva ishovna Sesosongolm. Mendah

Sesoasongolva prunnamo, manara, Yesusva mendah phonamo hevna pusambakambara. Wo os sewonamba himba nomba undnahonamba lovahthamnavrava Yesusmba, si lundthoavra hembra Sesoasongolnana.

*Indhanamba Hevmba Alhuna Yesusinda.*

<sup>40</sup> Indhanamba nom hillinamba, ten Yesus ishovnam. Wo mongnind opulvona, hona indhanariniva tanam nomba moashulnindrini lohv, temba Sesoava wolaihapralmba onamba.

<sup>41</sup> Wo mongnind opulvona, heta Kristusva, wo henga he unam, Kristusva si provavmoa Galiliriniva. <sup>42</sup> Doaramini tombaimorava os novol velohv, Kristusva si provav Devittindirini. Wo doaramini tombaimoa vena, os ona, Kristusva si provav Betlehemrini, no kembellini, ten Devit anam.

<sup>43</sup> Wo doa nomba indhanamba nengavnangva vruwul vevna, epowalwolalm evevna Yesusindam. <sup>44</sup> Monglava himba kevrilm vivna Yesusmba, wo heva os an eva ata hembra englava piata, kevrilmba?

*Yutanindna Kuwulva Owai, Undnahonamba Keknamba Amnavnamoa Yesusmba.*

<sup>45</sup> Wo no tempelduvna polisiva henga anganamba, di nongalpulvoa sembayang andranindna kuwulm eva Varisinindm. Wo no kuwul osihinna, manara yimba Yesusmba waiambmba owai viv? <sup>46</sup> Wo no tempelduvna polisi unna, himba ishovnamba manam manam mendeklinonoa, sna moamba an eva ishov? <sup>47</sup> Wo Varisinind opulvona, eva Yesusva yemba ambo daswoteita. <sup>48</sup> Wo es hevpa kava kuwulva, Varisinindva, kava hembra undnahonam keknam



amnavma? owainonoa. <sup>49</sup> Wo heva os nomba indhanamba, himba temba levrapiwolmba owai vivpa lohohmomba, Yesusmangas lovahmanav keknamba. Manara, Sesoava doa ona, himba si indkokla vilovav.

<sup>50</sup> Wo Nikotemusva di doara noi kuwul owalhovra patha-wulvahvna. Himba no indhanarini, nemetva himba gana nonglalmba Yesusmba sinimba. <sup>51</sup> Wo hev unna, si pinamba lohohmorava nisva lesvhoawol vinvramoa, indhanana moamba osva hillimnivavmoa boasnamba. Pivva lelnamba henamba lesvhueivavmoa, heva verava, pioa boasna velokusethivra, mani himba vena? <sup>52</sup> Wo hev noi indkumbi opulvona, wo eva yimba Galilirinima, osta Yesus ten? Beswonam yeoa numha vro pevmoa doaraminim tombaimom. Yimba ata levrapiyongovav, osva owaita, mongova moashulnindriniva provavmoa Galiliriniva. <sup>53</sup> Wo doa nomba indkumbiva os deuvramba bukethungu vena.(7:53-8:11)

## 8

*Ungevlirinikoklamba Kevrinamba, Waiambna Yesusindam.*

<sup>1</sup> Wo heva os Yesusva gana oliv denwit oloram.  
<sup>2</sup> Wo venamba, olingil lihapiavnamba, himba henga gavnamba, siha tempelduvra. Indkumbiva indhanamba provna heindamba, wo himba ovhoanamba, numhowol vevna hembra. <sup>3</sup> Wo vena, nonoanind lohohmona eva Varisinind, he dom ungevlirinim mongom tlatrinim pulsaivna,

---

(7:53-8:11) **7:53:** Nonoanindva os uv, honamba moamba Yonmba hevpa novol venamoa.

os hembra nunghinamba, tendom pelkomo vevna himba. Kleiha wulanganamba, indkumbi di novlomos wulavnam, di hulvundthue.

<sup>4</sup> Wo hev umnina Yesusm, guru, hona ungevlirinimba kevriva, nonamba mongo tendorini lohlohvna, hevna tlaliva owai. <sup>5</sup> Wo Mosesna lohohmomba os ona, pivva miklewol vivra ungevlimba honna, nomba temba osva himba vivrava. Wo ye kam wohtrava, kava ata es vivav?

<sup>6</sup> Himba ambo osihminivna honamba, osm verava, ora os Yesusva ov, wo himba no moana waiishuvav wetatmorava hembra. Wo heva os Yesusva mulumbdandna lohvhooanamba, novol vewol vavovna pethasra hevna englapundna.

<sup>7</sup> Himba di mendah sah ovralthovvna Yesusmba. Wo Yesusva phonamba, lohvhoo, wo hev unna, huiva mongova yimba waiolvohvma besalva? Wo hanoi ora, ka men besalva indhanariniva lohv, henoisna honoa mioa pipiamnara hona ungevlirinimoa. <sup>8</sup> Wo Yesusva henga ovhoanamba, pethasra novol vewol vavovna.

<sup>9</sup> Nomba indhanamba moamba Yesusnamba hillinamba, wo himba indakonda vovoha vevna nominiva. Seilmba mundkolalsna miva vovoha vevna, wo osoa ambo noi hev indkumbi. Yesusva di waiana no ungevlirinimba hevho. Himba di lohvna Yesusna novlomossis. <sup>10</sup> Wo Yesusva henga phonamba, osahmana hembra, indkumbiva indhanamba nomba es hevpa, doa gapiaima? Mongova heriniva yemba ishomnima, osva yimba sahonam vevna? <sup>11</sup> Wo no ungevlirini ophona, owai, mongova kamba ishomnimoa, osva yimba sahonamba vena. Wo Yesus omnana, eva kava

owai, yemba osva ishomnavavmoa. Wo doa yeoa gao, os aembu, sahonamba manam yimba vevra hengava.

*Yesusva Wokla Pethanindna.*

<sup>12</sup> Sismba Yesusva ishunvna indhanamba henga. Hev unna, ka woklava hona pethanindnamba. Himba nomba kamba pethamnavrava, henomba si sikulmonamba avramoa, himba si avra ambarangas, beswonam nonapopol avm. <sup>13</sup> Wo heva os Varisinind umnina Yesusmba, yimba pevmba ishovpa, ye mongawa indhana ambo ishov, osva manimani honamba memba tanam. Kava nomba ningvmoa, yimba temba ishovpa.

<sup>14</sup> Wo Yesus ophona, lehra kava ishovna honamba kavm, heva os tanam. Kava kavpa nonora lohv, osva kava nomini prona. Wo eva kava kavpa nonora lohvta, osva dom no kembellam si kava gavav hengava. Yimba tit viv, osva kava hinimini prona, wo hem si kava gavav. <sup>15</sup> Yimba indhanamba lesvhoawol viv pethanindna wevsana ambo. Heva os kava kavhova ishomnavmoa mongomba, osmba yimba sahonamba vena. <sup>16</sup> Wo heva os kava mongomba lesvhoatava, kana moamba tanam lohvra, manara, eva mani kavhova ishov. Ara noi ten kam wolaihapanam, he kamba waivev.

<sup>17</sup> Yena pevna lohohmomba osva unna, non-amba sambla indhanamba novna enonglalva mongawamomba evevravpa, wo yimba uvra, lehra ohov. <sup>18</sup> Kava eva kamomba ishov, heva os ara, ten kam wolaihapanam, hev kamomba ishov, mongawamoa evevrav.

<sup>19</sup> Wo hev osihminina, hi arapevpa yenamba? Yesus ophona, yimba mendah tit verumbtv kamba, kam eva aram. Wo heva os yimba kamba lihatava, wo eva yimba osva lihavavta aramba kanamba. <sup>20</sup> Yesusva honamba ishunvna, di hev ten numhowol vevnam tempelmera. Wo himba di lohvhua vevna, nolhra tempelna di ten sungulvnam. Wo heva os owai, an eva englava piata, hembra kevralmba. Noinda hevnamba nambainonoava mendah provnamoa.

*Yesusva Yutanindna Kuwulmba Pepeh Vewol Oyona, Si Maim Yimba Monamba Kuvhueivav Sena Kembelmonamba.*

<sup>21</sup> Henga Yesusva unna indhanamba, kava si sandhalangavav yemba. Yimba si kamba aslavav, wo heva os yemba si dalvra pevna indkoklanahonam. Yimba domba ambvavmoa, kava domba gavavpa. <sup>22</sup> Wo Yutanindva uvna, es hevato, Yesus heva hevni si wukleihavmi? Memba osva, esalm himba oi, yimba domba ambvavmoa, domba kava gavavpa. <sup>23</sup> Wo Yesus unna, yimba hona indhanamba honamini. Wo heva os kava senamini. Yimba hona petharini, heva os kava hona pethariniva owai.

<sup>24</sup> Wo kava yemba os ishunv, yemba si dalvav pevna indkoklanahonam. Tanam yemba si dalvra pevna indkoklanahonam, yimba undnahonamba almba owai vivrava, osva kavpa memba kava.

<sup>25</sup> Wo hev umnina, wo an eva yimba? Yesus ophona, kava henoi, ten kav ishunnam yem seilm. <sup>26</sup> Kava esvema wetatmomba ieinv yenamba, heva os owai. Manara, kava ishunv indhanamba nomangas, ten kav hellevnam henonamini, henoi

ten kam wolaihapanam. Wo himba tanamangas wohishov.

<sup>27</sup> Indhanamba beswonamba levrapivolv-namoa nomba, osva ovna, Yesusva ishuny kamba aralmom. <sup>28</sup> Wo hev unna, yimba si wukleihivav arana ombolmba. Wo yimba nonam si nunglivav, osva kava he lohvna. Yimba si nunglivav, osva honamba manimani memba kava vevnamba, kavna nengavnangnamba owai. Yimba si liheivav, osva kava ishov nomangas, ten ara ishomnanam kam. <sup>29</sup> Wo himba nomba temba kamba wolaihapanamba, himba kamba nihra vrev. Kava elsusva vev nongas, osm noinda he und lothovra. Wo noinda osva himba kamba nombolvhoavmoa. <sup>30</sup> Honamba osva Yesusva ona ishunna, indhanamba mindnam hembra undnahonam lovahthamnavna.

*Moanonoara Si Indhanamba Amanamana Vevra Windewonamba.*

<sup>31</sup> Wo Yesusva ishunvna nom Yutanindm, he noi ten lovahthamnavnam hem, unna, yimba osangasva wohengivrava kana moamba, yimba osva wohavra kavtindinonowolm. <sup>32</sup> Wo yimba si os levrapivolvav moanonoamba. Wo no moara si yemba beswonamba vewol vevra windewonamba. <sup>33</sup> Wo Yutanind opulvona, kava memba Aprahamna towandal av. Kava doava anamoa doarava ombandhana andranindilmba. Wo esalm yimba memba osva oi, yimba si windewonam avra?

<sup>34</sup> Wo Yesus henga ophona, kava yemba ishuny tanam. Indkumbiva himba nomba temba avpa hevna indkoklanahonamba, himba nomba temba av indkoklana andranindilm.

<sup>35</sup> Ombandhana andranindriniva eukwonamba deuvrava eivvmoa hevtindimongova, heva os ombolva hevtindina yunalm. <sup>36</sup> Wo noinda osva Sesoana ombolva yemba kilumbshuawol vetava pevna indkoklanaminiva, wo osva yimba si avav windewonamangas.

<sup>37</sup> Kava nonora lohv, yimba Aprahamna towandal av. Wo heva os yimba kamba helvakomandhalm viv, noinda kanamba moamba siheinvmoa yena undrava. <sup>38</sup> Kava ishunv yemba, nom ten ara kavna kam nov wolaihamnanam. Wo heva os yimba viwul vevna nongas, ten pevna arapev pevm ishunvnam.

<sup>39</sup> Wo hev opulvona, simbemba kanamba luhunna Apraham. Wo Yesus unna, yimba tanamba Aprahamtindiva atava, yimba ata manimani vivta, nomba temba Aprahamba vevnamba, noinda himba Sesoam tanamba lohmanavna keknamba undnahonamba. <sup>40</sup> Kava no indhanarini, kava tanam yemba ishunv, nomba kava hellenamba Sesoanaminiva. Wo heva os owai, yimba kamba helvakomandhalm viv. Heva os owai, Aprahamba osva vevnamoa. <sup>41</sup> Wo manimani memba yimba vivpa, yimba os viwul viv, ten pevna arapev vevnam.

Wo heva os Yutanind opulvona, kava snamba avmoa, timingrinimsnamba. Sesoava aralva kanamba einv. Hengas aramba luhunv kanamba. <sup>42</sup> Wo Yesus unna, owai, Sesoava aralva luhuntava tanamba yenamba, eva yimba ata kamba und vivta. Manara, kava prona Sesoanaminiva, veiva, men hui av kava daipotava. Kava pronamoa kavna undnamba, Sesoava wolaihaprana kamba.

<sup>43</sup> Yimba beswonamba levrapivolvmoa nomba moamba, temba kava ishovpa, manara, yimba avmoa kana moanamba.

<sup>44</sup> Yenamba arapevpa luhunna Setan. Wo yimba hena av, wo yimba ningv nomangas velmba, he nom nengvm. Himba doaramini wohlohna, indhanamba helvakomo velmba. Himba ovunna, beswonamba almba, manara, sna undva heindava lohvnomoa. Himba nomba moakokomomba ishunyva, wo himba hevpa snal noi moakokomoa, hev ten ishovm. Wo himba hevm moakokomona aral vilov. <sup>45</sup> Wo heva os kava ishov tanam. Wo osva yimba noinda kana moamba kek vithivmoa. <sup>46</sup> Wo yimba mongova osva nonglavma, kava sahonam vevna, a? Kava tanamba ishov, wo noinda manara eva yimba kamba amnamba owai venavna undnahonamba, a? <sup>47</sup> Himba nomba Sesoanamba, wo himba nomba Sesoana moamba hellev, kek vethav. Wo heva os yimba hellevmoa, nomba temba Sesoava ishovpa, manara, yimba avmoa Sesoanamba.

### *Yesus Kuvhoav Apraham.*

<sup>48</sup> Wo Yutanind opulvona louwolm, kava os uv, yimba Samarianindrini lohv. Kava os uv, tih-songova doa yena nihmerava sihana, wo henoi yemba wuhho ovrav. Wo es hevpa tanamma, a? <sup>49</sup> Wo Yesus ophona, tihsongova mongova avmoa kana nihmerava. Kava kavna arana nihilman-gas okolomana vev, wo heva os yimba kamba pethambrora opelpetha uvmona vev louwolm.

<sup>50</sup> Heva os kava eva nengvmoata, andra velmba, kavna nihilmba noindamba popeng vrelmba. Manara, ten mongo lohv, henoi nengv, kana ni-

hilmba wivelm. Wo hev kamba lesvhoav, osva ora kava indhanarini windel lohv. <sup>51</sup> Kava ishunv yemba tanam. Himba nomba kana moamba engvrava, hem nomba si dahavramoa.

<sup>52</sup> Wo Yutanind umnina Yesusm, daipota doa kava levrapiiei, osva tihsongova av yena nihmerava. Doa vena, Apraham dahana, moashulnindm dalna. Wo heva os yimba os oi, himba nomba kana moamba engivrava, si hem nomba dalvramoa. <sup>53</sup> Wo yimba os nengvma, ka mendekliva, ka wohkuvhoav Aprahamba, a? Wo doa vena, Apraham dahana, eva moashulnindm dalpiana, wo yimba an hevpa eva, a?

<sup>54</sup> Wo Yesus ophona, kava kavmba okolatava, nomba okolalva kanamba kava ombam ambo opelthavra. Heva os mongo kana nihilmba wivev, Sesoa aral, hona indhanariniangas, temba yimba olvohvpa, memba kana Sesoangas. <sup>55</sup> Wo heva os yimba beswonamba liheivmoa hembra. Kava kavpa lihav hembra. Wo kava osva otava, kava tit venav hembra, wo osva kava moam kokovav, os ye ten uvm. Heva os kava kavpa lihav hembra, wo kava wohengv, nomba himba temba ishovpa. <sup>56</sup> Pinamba simbemba Aprahamba indk vethana, osra himba si nonglavav kana nambaimba. Himba doa kanamba nambaimba nonglana, wo himba doa indk vethana.

<sup>57</sup> Wo Yutanind umnina, a es yimba ov? Owai, yimba henanam eva ata nonglata Aprahamba, yimba mendah, 50pelarava tahonmba yenamba lohvnamo? <sup>58</sup> Yesus ophona, kava ishunv yemba tanam, Aprahamba avalva sism lengna, kava doara doa avna. Manara kava kavpa men.



<sup>59</sup> Nonamba Yesusva honamba ona ishona, indhanamba honmba ovravna, heindam dom pipi veihemb velm, una, himba hevmba opusvundthovna, os ovna, kava Sesoa lohv. Heva os Yesusva nominiva koho lohvhonamba, wo os himba pholahangana no tempelliniva.

## 9

*Yesusva Sishona Vrena Novtitmungilm, Nom Aval Doara Ten Ambo Snal Lengnam.*

<sup>1</sup> Yesusva monam ona gana, nongla indhanarinim novtitmungilm, nom aval doara ten ambo snal lengnam. <sup>2</sup> Hevtindi noi 12pelara osihminina, an indkoklava venamba, hona indhanariniva noinda novtitnahonamba lengna, hev venami, a aralaval evenami?

<sup>3</sup> Yesus opla vrinna, hona indhanarinina aral avalna indkoklarava owai, himba novtit venamoa. Hona indhanariniva, avalva novtitmungil wohlengna, osm ata Sesoana keknasowolva honinda, osm si indkumbiva nunglutithoavra heinda. <sup>4</sup> Hillu, mendah upsil lohv, pioa nihnapehna vrivei hena nona andramoa, himba temba kamba wolaihapanamba. Noinda doa simba murapeta ihprakav, wo an eva andra vevra sinimba? <sup>5</sup> Kava huiva avrava petharava mendahva, ka upsilva hona pethariniva luhunv yemba.

<sup>6</sup> Honamba doa Yesusva ishopianamba, doa hev muemb topholothonamba, pethambrowolm nona weisvre. Wo venamba, nona novm sanbas vrowolmana no indhanarinina. <sup>7</sup> Wo hev

omnana no indhanarinim, garava, Siloam tovalpra pora daloho. Wo no indhanariniva os gana, poramba daloholmba. Wo himba poriniva hengava provnamba, himba doa beswonam henga nov vilprovna. Nomba pomba osm alvna, Doa Wolaihangav.

<sup>8</sup> Monglava indhanamba nunglivnamba hona indhanarinimba, temba doarava kekamnakrava wulongo lohvnamba. He eva no indhanarinina owal una, nunglu, es hevpa no indhanarinima, ten kekamnakra wulongolohvnam? <sup>9</sup> Mongla opulvona, hevta hev noi. Wo heva os mongla uvna, owai, himba nomba owai. Heva os himba snalta eva lohv. Wo venamba, no indhanarinini hev onam, kava menta. <sup>10</sup> Wo hev umnina, es yimba vei? Manana vei yimba pevna novmba?

<sup>11</sup> Hev unna, indhanarinini henamba nihilva os alv, Yesus, petha weis vreiva, kana novm nona sanbas vrowoli. Wo kamba omna, garava, Siloam tovalpra di daloho. Wo kava gaiva, di dalohkai, wo kava os henga beswonam wohnovvei. <sup>12</sup> Wo hev sah ovrivna, wo no indhanariniva es vei? Wo no indhanarinini unna, kava eva tit venavta.

*Varisinindva Sah Ovrivna, Nom Yesus Ten Sishona Vrenam.*

<sup>13</sup> Wo indhanamba nomba vinamba, os waianginna Varisinindinamba, hem nomba temba Yesusva hembra sishona vrenamba. <sup>14</sup> No nambainamba, Yesusva temba pethava weisvrenamba, wo hena novm nona pevhoawolmana nona, nonam vena, Yutanindnamba vah iaevul okomba luhunvna nonamba. <sup>15</sup> Wo doa Varisinindva sah ovruwul vevna no indhanarinimba, umnina, es yimba

venai pevna novmba? Hev unna, himba pethambrona sanbas vrowoli kana novmba. Wo kava pora dalohoiva, os kava novpa pevhoawolei hengava.

<sup>16</sup> Monglava Varisinindva os eishovna, hona indhanariniva osva nenglohvmoa, ov, memba vah iaevul okomba owai, wo noinda pivva liheiv osva himba pronamoa Sesoanaminiva. Mongla uvna, heva os indhanariniva indhanarinikoklava atava, osva mendekliandrava vevramoa, memba honamba himba vevpa. Wo noinda osva mongawamomba owalmongova eukvrivnamoa owai. <sup>17</sup> Wo henga osihminina no indhanarinim, es yimba nengmanav no indhanarinimba, yena novmba himba temba pevhoawoliva? Wo no indhanarini unna, himba mongo moashulnindrini.

<sup>18</sup> Wo heva os owai, Yutanindna kuwulva nomba moamba hillinamoa, osva ona, lehra ov, himba doara novtit vevna, wo heva os himba doa henga beswonam novvev. Wo doa himba vinamba, indhanam monglam wolanga vina, no novtitmungilna aralavalm onhalvunilm. <sup>19</sup> Wo hev sahinna, es hevpa memba yena ombol luhunvma? Yimba es ohov, hembra ambo doara snal novtitmungil lingnama? Wo es hevpa eva himba novvev daipotava hengava?

<sup>20</sup> Aralaval uhunna, kava enonglav, osva memba kana ombol luhunv, wo kav vei, elihav, osva hembra doara snal lingna novtitmungil. <sup>21</sup> Wo heva os kava tit evev, es himba hengava novpa vev. Kava tit evev, an dihi henamba novpa pevhoawoli. Osihminu hevm. Himba

mani eusilma, hev ata yemba ishunvav.  
<sup>22</sup> Honamba moamba aral avalva noinda ihishovna, himba pem evinvna Yutanindna kuwulnapenam. Manara, kuwulva doara doa osva ningna, himba nomba osva otava, Yesusva Kristus, hem nomba ata os wolaihapulvovav sembayangduvriniva. <sup>23</sup> Noinda aralavalva sna moamba osva ihishovna, himba mani eusilma, osihminu hevm.

<sup>24</sup> Wo henga Yutanindna kuwulva umnina, nom ten novtitnahonam aval lengnam. Hev umnina, yea okolavm Sesoamo, wo os kamba ishunu tanamolnam. Kava os ningv, no indhanariniva indhanarinikokla. <sup>25</sup> Hev unna, kava eva tit venavta, osva ora himba indhanarinikokla lohv. Wo heva os mana vemamba kava nonora. Kava seilmba avna novtitna, wo daipotava doa kava novvev.

<sup>26</sup> Wo no Yutanindna kuwul umnina, mani venei himba yemba? Es venei himba yemba, hengamba novvelmba beswonamba? <sup>27</sup> Hev ophona, kava doa doara yemba ishuni osva. Wo heva os owai, yimba hillimoa kamba. Manaram yimba hengava hevpa hellelmba uv honamba? Wo es hevpa yimba lovahalm uvma hetindilm? <sup>28</sup> Wo moalusna di alalkoho esvema hembra, umnina, yimba hetindirini, kava memba Mosestindi av. <sup>29</sup> Kava nonora lovahv, osva Sesoa ishomnana Mosesmba, wo heva os kava owaimomolmba levrapivolvmoa no indhanarinimba, osva himba hinimini prona.

<sup>30</sup> Wo hev ophona, memba ambo yimba sahonam eishov titnam. Yimba tit viv, osva himba hinimini prona, wo heva os himba pevhoawoli

kanamba novpa. <sup>31</sup> Pivva indkumbiva nonora av, osva Sesoava helwolvmoa indhanakoklamba. Heva os Sesoava helwolv, nom ten vev, sembayang viniv, eva engivm hevm. <sup>32</sup> Monglava doarava sna moamba ishumnivnamoa, hillinamoa, indhanariniva nov velmba, snamba temba doarava avalva lengnamba snamba. <sup>33</sup> Wo hona indhanariniva Sesoanaminiva lohmba owai vetava, ata himba vevtamoana mana vemava snamba.

<sup>34</sup> Wo hev louwolm umnina, yemba avapevpa lengna indkoklanahonam. Wo es hevpa yimba ambo kam numhowolalm ovma? Wo hev opulvona, wohpholahangao, manam hengava yimba sihavav homba.

*Hindva Nomba Keknamba Temba  
Undnahonamba Amba Owai Vivpa, Himba  
Novtitmungilmsna Av.*

<sup>35</sup> Yesusva hellena, osva himba doa engvawul vei hembra nominiva. Wo doa Yesusva hembra silelnamba, omnana, es hevpa yimba keknam undnahonam lohmanavma arana ombolmba? <sup>36</sup> Hev omnana, mendekli, an ombolva aranamba? Ishomno kam, wo osva kava hembra keknamba undnahonamba lohmanavra. <sup>37</sup> Yesus omnana hembra, yimba doara doa nonglana hembra. Arana ombolva, men yemba moamba waiishov daipota. <sup>38</sup> Hev omnana, tanam, kava keknam undnahonam lohv. Wo hev mulumbdandna lohvhoamnanamba, okolavna Yesusm.

<sup>39</sup> Yesus omnana, kava sihapra vena hona petharamba, osm pethanindmba lesvhoawolalmba. Kava prona, osm novtitmungilva

henga beswonam novpa vivra, wo himba nomba memba beswonamba nov vivpa, himba henga novtitmungil avra. <sup>40</sup> Monglava Varisinindva di doara lovahvna murapeta Yesusinda. Nonamba himba nomba osva ona hillina, hev umnina, yimba kamba os unima, yimba novtitmungil eva avta a? <sup>41</sup> Yesus unna, yimba osva utava, kava indhanakokla av, osrava si Sesoava yemba unvavmoa, osm yimba indkokla vina doa. Heva os daipotava yimba os uv, kava wuvol indhana av, novviv beswonam, wo noinda osva Sesoava si yemba os unvav, yimba indkokla vina doa.

## 10

### *Yesusva Besal Kekalvhonindrini Sipsipnamba.*

<sup>1</sup> Yesusva os ona, tanam kava ishunv yemba, indhanariniva vongavavmoa tuvsharava sipsipna ninvhoramba, heva os himba vongavav mongnashara indanam, sna indhanariniva temba yukovindrini. <sup>2</sup> Himba nomba diva tuvsharava sihavrava, temba himba nomba sipsipna kekalvhonindrini. <sup>3</sup> Wo indhanariniva nomba tuvpa kekalvho vrowovrava, hembra velaihamnavra tuvpa. Wo sipsippa hillimnivra moalamangmba no kekalvhonindrininamba. Himba wonewol vevra hevna sipsipmba, nihilm indakondakonda sevelunvra, wo os himba deisumbi lohmana vevra hembra.

<sup>4</sup> Wo himba os wonphovrava, os wonlohmana vevra. Wo hev ku mi wulluhunvrava, os deisumbi lohmana vevra. Himba engingivra, manara, himba hillimniv kekalvhonindrinina moalamangmba. <sup>5</sup> Wo heva os himba mongomba

indhanarinimba patvmonavavmoa. Himba pilialowolavav henaminiva, noinda himba hillimnivmoa hena moalamangmba. <sup>6</sup> Yesusva honi ishunna moamba indhanamba, wo heva os himba levrapiolnamoa honamba moamba temurava.

<sup>7</sup> Wo henga Yesusva unna, kava ishunv yemba tanam. Ka tuvmsna sipsipnamba luhunv, ninvhomba. <sup>8</sup> Indkumbiva indhanamba temba miva doarava prowonamba, vevna, yukovnind, eva allambawonda. Wo sipsippa hilwilvnamoa hembra. <sup>9</sup> Ka tuvpa. Indhanariniva himba nomba kaindava sihavrava, hembra si lopshavav. Himba si beswonam vevra, sihavra, phovra, innemba silelalmba. <sup>10</sup> Yukovnindriniva prov, vev, yukov velm, eva indkokla vewolalm. Heva os kava prov, daswolalm undm, eva osm wohlundthoara undnangas.

<sup>11</sup> Kava besal kekalvhonindrini. Besal kekalvhonindriniiva hevmba wirehunv, daheinilm sipsipm. <sup>12</sup> Andranindriniimba, nomba temba diva dambroh velvohvpa, sipsip andrarava, temba indanapetam no kekalvhonindriniirava, hembra temba dahwol vevpa. Wo nomba andranindriniiva nonglatava allambawondamba, osva ora, ten prov, himba dandwonam wohgavav, bumbrislhangavav sipsipmba di. Wo doa allambawondava os kelvhueindava, engalungu vevra, wo os sipsippa bukithengu vevra. <sup>13</sup> Indhanariniva dandwonam wohgana, noinda himba di andranindrini ambo. Himba undnahonamba andra vevnamoa, sipsipmba kekalvho vewolalmba.

<sup>14-15</sup> Kava besal sipsipna kekalvhonindrini.

Kava lihawol vev kavna sipsipmba, os ten ara kam lihavm. Wo eva kana sipsippa kamba kavmba lihevavta. Kava kavmba wirehunv, daheinilm kavna sipsipm. <sup>16</sup> Wo kanamba monglava sipsippa lovahv, heva os hona pueilmerava owai huiva. Wo kaoa hemoa wonproita eva. Himba si eva hillivrata kana moalamangmba, wo osva si lohvav, mongal sipsiptindiva, mongal kekalvhonindrini.

<sup>17</sup> Aramba mindnam kamba und vev, noinda kava kavmba wirehunv, dahalm. Kava kavm wirehunv, dahalm, osm kava si hengava beswonam kavna nihnamba avav. <sup>18</sup> An eva kamba si helvakomandhavav? Kava yunalm kavmba wohwirehunv moahui. Kamba an eva ovomnavav owai, wo eva kava hengava kavna nihnamba avrava, an eva kamba ovomnavav? Honamba memba, aramba kamba os omnana velmba.

<sup>19</sup> Henga Yutanindva owai, owalmongova mon-gawamomba eukvrivnamoa, noinda hona moa, snal Yesus ten ishovnam. <sup>20</sup> Indkumbiva himba os uvna, tihsongova doa sihamnana nihmera, wo noinda hembra daielmba ovomnav. Manara hilliv yimba hembra. <sup>21</sup> Heva os mongla uvna, indhanariniva nomba temba daiva venavpa tihsongonamba, osva ishovmoa sna moamba. Wo es hevpa tihsongova pevhoawol vinvrama novtitmungilna novmba?

### *Yutanindva Waialhuvna Yesusmba.*

<sup>22</sup> Wo doa inetihva mendekli phunvna Yerusalemrava. Nom seilminim henga nengvhueinam, lehalm deuvm, os memba Sesoana tempelduvnonoa. Memba nonam vivna,



namvuvi hulvui iavnam. <sup>23</sup> Yesusva di lohmana vevna tempelmera Solomonna plasangsis. <sup>24</sup> Wo Yutanindva hembra kusomnanamba, hev umnina, eva mani om yimba phonama, kamba wera vewolalmba pevindava. Yimba tanamba Kristusva lohtava, wo eva os ishunuta musera kamo.

<sup>25</sup> Yesus ophona, kava ishunna yemba doa doara, wo heva os yimba kek vithinamo. Osva kava memba mendekliandrava vevpa arana nihilla. Wo noi mendekliandra kamba museramba holvonethav, osv kava men. <sup>26</sup> Wo heva os yimba owai, mendah tit viv, manara noinda yimba kana sipsippa owai. <sup>27</sup> Kanamba sipsippa aong velvohv kana moalamangmba. Kava lihawol vev hembra, wo himba kamba wohengpetv. <sup>28</sup> Kava daswolv undva, yunalm nonapopolm wohalm, wo hembra si dalvramoa. Wo mongova indhanariniva hembra yukov vevavmoa kana englariniva. <sup>29</sup> Ara kana kamba holvorombraohna sipsipmba. Himba manana manana mendekli woheinv, wo an eva mongova yukov vevav kanamba sipsippa kana arana englariniva. <sup>30</sup> Kava araiva mongawundna mongal ahav.

<sup>31</sup> Wo henga Yutanind hon di ovre, Yesusm nonam miklelm. <sup>32</sup> Wo heva os Yesus unna, kava doa vewol vena mendekliandrava besal aranaminiva. Wo heninda yimba kamba miklelmba viv?

<sup>33</sup> Wo Yutanind opulvona, kava miklelmba vivmoa yemba, noindava memba besal andrava yimba venamba. Heva os ten pev ishomnavna sahonam Sesoam. Yimba ambo mongo indhanarini-

nonoa, wo heva os yimba os oi, kava lohohra, os Sesoa ten avm.

<sup>34</sup> Wo henga Yesus ophona, ten novol veluhunv pevna lohohmora, osva Sesoava os ona, yimba Sesoamsna av. <sup>35</sup> Honamba tombaimomba hembra os nengsmoa ov, yimba Sesoamsna av, indhanamba, henom Sesoava hevna moamba ishunna. Wo no tombaimomba gekalava ishovmoa.

<sup>36</sup> Kava memba noi, Sesoa kamba pusvundthoana hevelm, wo wolaihaprana petharam. Wo manara yimba osva uvna, kava sahonam ishomnavna Sesoamba, noinda kava osva oi, kava Sesoana ombol? <sup>37</sup> Kava nomba owai vetava, temba aramba vevpa, wo osva manam yimba kamba keknamba amnavra undnahonamba. <sup>38</sup> Heva os kava vetava, osva temba aramba vevpa, eva yimba kamba keknamba amba owai venatava, nom ningvm, ten kav vewol vevm mendekliandramba. Wo yimba osva levrapivolvav, osva aramba kana nihra av, eva kava arana nihmera av. <sup>39</sup> Wo henga Yutanindva kevralm vivna Yesusmba, heva os himba hoai vinna henaminiva.

<sup>40</sup> Wo doa Yesusva os gana, Yotan pom lovongo venamba, dom gavna, ten Yon Baptais nemet pona poswol vawonam. Yesusva di avna, <sup>41</sup> wo dom indhanamba esvemava provna heindamba. Hev una, Yonmba mendekliandrava osva vevnamoa. Heva os manam manam, Yonmba memba ishomnavnamba hona indhanarinimba, tanam. <sup>42</sup> Wo no kembellava mindnam lovahthapramnana keknamba undnahonamba Yesusmba.

# 11

## *Lasarusmba Dahana.*

<sup>1</sup> Mongo tendorini lohvna, nihilva henamba Lasarus, wo hembra uvavulm dihelvna. Himba di avna Betani kembella, di ten ahavna muskovol sambla Mariai Martai. <sup>2</sup> Mariava no ungevlirini, dawonamba he si welsandava sovhomnavav mendeklimba, wo hevna tana sowol venavav. Mariana muskovolva Lasarus lohvna, wo doa hembra daipotava uvavulm dihelvna. <sup>3</sup> Wo Mariaiva Martaiva evenamba, mongom ewulihanga, ishomnalm Yesusm, omnana, nomba sehpevpa, yimba temba hembra mindnamba und velohvpa, uvavulm dihelv.

<sup>4</sup> Wo nomba Yesusva ona hellena, hev unna, nomba uvavulva temba venavpa, osm hembra wohdahavavmoa. Temba ambo osm, indhanamba nunglivra pusambakambam Sesoanam, wo nihilm wulovolmanavra. Eva honamba memba osm temba vei, popeng vrelm Sesoana ombolm. <sup>5</sup> Yesusva mindnam und vewol vevna Martam, hevna moasalalm, eva Lasarusm. <sup>6</sup> Wo heva os nonamba himba osva hellenamba, ona, Lasarusva uvavulm dihelv, himba diva henga dawonam samblanin vewolna.

<sup>7</sup> Wo doa Yesus unna hevtindim, henga angalohra Yutia provinsram. <sup>8</sup> Wo hevtindi una, heva os Yutanindva diva yemba honnam helvakomandhalm vivna. Mani doarama, owai. Wo yimba hengam dom galm ov? <sup>9</sup> Wo henga Yesus opla vrinna, owai, eneha ata ye andram nongthovav, mendah nambaiva lohv. Mongova indhanariniva lohmana vetava okombanamba, hembra lomotat vepevavmoa, manara noinda

himba nonglav hona woklamba petharinimba. <sup>10</sup> Wo heva os mongova lohmana vetava sinimba, hembra lomotat vepevav, manara noinda manakambara eva ata himba nov vevta. <sup>11</sup> Honamba Yesusva ishopianamba, wo henga hev unna, pina sehelva Lasarusva ninpol kovopei ambo. Heva os kava gav domba, deuhvholm ninmerinim.

<sup>12</sup> Wo hevtindi umnina, heva os himba ninmba litava, ova henamba uvavulva hembra si wuleihavav. <sup>13</sup> Yesusva osm unvna, doa Lasarusmba dahana. Heva os hevtindiva os ningvna, Yesusva ambo ov, ova Lasarusva ninpol kovopei. <sup>14</sup> Wo doa Yesusva moakus unvna, unna, Lasarusmba doa dahana. <sup>15</sup> Heva os kava yem ninginv, eva ka vei, indk vethav, ova kava heiva mongawulmba ahanamo. Manara, noinda ata yimba kamba undnahonamba wohlovahthamnavav mindnam honindava. Wo doa pioa angavai heindam daipota. <sup>16</sup> Yesusva ishopianamba, wo doa Tomas, mongova henamba nihilva Ditimus, hev unna owalm, pioa angavaita, pimba si dalvra hemongo.

*Yesusva Ona, Phona Plalva, Kava Men Kav Lohv.*

<sup>17</sup> Yesusva phonamba Betanira. Di himba hellevna, ova Lasarusmba doa dahana, wo honmerava os vindilna, 4pelara okombava lohmanana. <sup>18</sup> Betaniva mani ehallama, ambo lohvana murapeta Yerusalemrava, 3pelara kilomita ambo. <sup>19</sup> Wo noinda ova Yutanindva esvema pulningewolvna Mariaimba Martaimba, osm noinda undwonam ahavra, doa daheinna henamba muskovolmba.

<sup>20</sup> Martava helle, ona, Yesusva doa di prov, wo himba deuvriniva venamba, monaram gavna,

suwihalm Yesusm. Mariaoa di ana deuvra.

<sup>21</sup> Marta omnana Yesusm, doarava yimba huiva atava, kana muskovolmba ata dahatamoa.

<sup>22</sup> Heva os kava nonora av, osva eva daipotava yimba sahmanatava mana vemamba Sesoamba, yemba vraohvav.

<sup>23</sup> Yesus omnana, yenamba muskopevpa si phovav, wo henga si beswonam avav. <sup>24</sup> Marta ophona, kava nonora, osva himba si henga phovav, nonam ovi pethai hoai evewolvram, nonamba Sesoava nambavrava.

<sup>25</sup> Yesus omnana Martam, phona plalva, kava men kav lohv. Himba nomba temba kamba keknamba undnahonamba lovahthamnavpa, himba si yunalm wohavra, eva hembra dalvra.

<sup>26</sup> Wo hindva nomba memba avpa, himba keknamba kamba lovahthamnavrava, si hembra dalvramoa. Marta, yimba keknam nengvma honamba? <sup>27</sup> Marta ophona, kava keknam amnav honamba, osra yimba Kristus, Sesoana ombol. Yimba noi, ten hom pronam hona petharam.

### *Yesusva Lasarusm Wivevna.*

<sup>28</sup> Martava osva ishopianamba honamba, hev ganamba, omnana moasalalm Mariam dendwolla, protok. Doa pina guruva men einv, wo himba yemba osahei. <sup>29</sup> Nomba Mariava ona osva hellena, himba phonamba lelnam, os wohgana Yesusindamba. <sup>30</sup> Yesusva mendah sihapra vevnamoa kembellamba. Himba mendah di vevna, ten Marta nonglaphonam monara.

<sup>31</sup> Yutanindva waiaevulvna Mariamba di devmora silembakombam. Yutanindva nunglivna,

doa lelnam wohpho, wo himba osoa wohpatv-monavna hembra. Himba os ningna, Mariava gav pokamaram dom, wenam owolm. <sup>32</sup> Heva os Mariava dom gavna, di ten Yesus avnam. Non-amba Mariava ona nonglana hembra, vendpenamba Yesusna monglasra, hev omnana, yimba doarava huiva atava, ata kana muskovmba dahatamo osva.

<sup>33</sup> Yesusva nonglana, Mariava wivev, wo eva Yutanindva nomba nungwulimbnamba, himba eva wuovnata. Wo Yesusva eva wosava innemolla lohna, wo himba eva wivelm vevnata. <sup>34</sup> Hev osihinna, hi yimba singvina hembra? Hev umnina, prorava, nonglo. <sup>35</sup> Yesusva wem osevravna. <sup>36</sup> Wo Yutanindva una, nunglu, eva mani eskandma, himba mindnam hevm und vev hembra. <sup>37</sup> Wo mongla una, Yesusva novtitmungilm sishona vewol vena doa, wo himba nov viv, wo eva eselm himba hona indhanarinimba kolvramba owai vena, osmba ata homeis hem dahavm?

*Yesusva Henga Wolaihaphona Pokamarini  
Lasarusmba.*

<sup>38</sup> Yesusmba wavrava mendekli snal venavna i. Hev provna pokamaramba. Pokamava nomba honme mendekli, wo henga mongo hon velapathalohvna no mengallava. <sup>39</sup> Yesus unna, kihliheiu honm ehallam. Marta omnana, heva os mendekli, doa 4pelara simba penngiliha vungana, hembra os dahana. Ata nungva sahoklal vevav. Martava Lasarusmindna muskovolnonoa. <sup>40</sup> Wo hembra Yesusva omnana, doa yemba kava seilm ten ishomni, yimba kamba amatava keknamba, ata yimba nonglavav pusambava Sesoanamba.

<sup>41</sup> Wo doa himba os tuvriniva honmba kihliheina, wo Yesusva nov vevongo venamba, hev ona, ara, kava yemba os omnav, yimba lehra, yimba doa kamba hellei. <sup>42</sup> Kava nonora lohv, osva yimba elsus kamba hellellohv. Heva os kava ov honamba, noinda indhana, men doa kamba pulningei. Kava vinv osm hembra, heoa levrapieira honamoa, osra yepev kamba wolaihaprana.

<sup>43</sup> Yesusva honamba osva ishopianamba, hev mindnam vevandnam onam, Lasarus, pholangao. <sup>44</sup> Wo no mindva os wohphona, doara ten ninginam kayenna, nonahonam wohphona, eva novlomosm nom ningimninam. Yesus unna, selvowol vinirava kayenmoa, os nis gara.

*Kuwulna Mundilnamba Moa Mokoltheivna, Yesusm Helvakomandhalm.*

<sup>45</sup> Nomba Yutanindva, temba waiaevulalm prowonamba Mariamba, nunglina, ona, os vev Yesusva. Wo mindnam himba keknam lovahthamnavna hembra. <sup>46</sup> Heva os monglava Yutanindva anginvna Varisinindindam. Anganamba, nom temura ishunvna Varisinindm himba, ten Yesus venam. <sup>47</sup> Wo doa vena, sembayang andranindna kuwul, eva Varisinind, himba moamba wulvahvna, kusopho velm, moam ishunilm nom kuwulm. Hev una, si pimba es vivav? Hona indhanariniva mindnam mendekliandrava vewol vev. <sup>48</sup> Pimba hembra nombolvhueitava, os ora, hvaomanakavra honamba manimani osva, indkumbiva si hembra tovopethamnavav, keknam undnahonam alm.

Wo Romnindva si ambrava, pina tempelduvmba muehvinvav pivnahonam.

<sup>49</sup> Mongova indhanariniva di doara avna, nihilva henamba Kaiapas. He no tahonnamba sembayang andranindna kuwulva luhunvna. Kaiapas unna, yimba hona indhanamba memba owai, mana vemamba levrapivolvmoa. <sup>50</sup> Temba lehra, osva mongawa indhanarinim ambo daheinvav indkumbimba, si homeis indkumbim indkokla vilovm. Heva os yimba levrapivolvnamoa honamba beswonamba.

<sup>51</sup> Kaiapasva honamba moamba hevna nengavnangnamba ishovnamoa owai. Noinda osva ishovna, himba nonamba sembayang andranindna kuwul wulluhunvna no tahonnamba. Wo osva himba no moamba ishunvna, osva Yesusmba si daheinvav, Yutanindmba kolvrowolalmba, <sup>52</sup> eva indkumbim Sesoa towandalm, nom ten pethara vavawonam eungu vevm, osm si os himba mongawa moshrava kilihavav.

<sup>53</sup> Wo no okombanamba Yutanindna kuwulna mundilnamba doa moamba mokeltheivna, helvakomandhalmba Yesusmba. <sup>54</sup> Wo doa Yesusva owai, bambanam muserava Yutanindrava lohmana vevnamoa. Himba nominiva venamba, os gana mongnavhoram dom murapetam sahal petharam. Himba gana mongona kembellam, os ningthiv Evraim, wo di wonavna hevtindimba.

<sup>55</sup> Pasovatihva murapeta phunvna, nom nengewuvulm, Sesoa ten Israelnindm wonphonam. Indkumbiva no kembellini, no kembellini, os provna Yerusalemba no tihramba.



Himba angavna, hevm vendwolaihawolalm, osm ora, kakowa lehrangas Sesoana novrava av. <sup>56</sup> Wo doa indhanamba etapewulungu vevna Yesusmba. Himba di tempelduvra lovahthavnamba, asahmana ungu vevna owalm, es hevpa himba provma hona tihrama? Es yimba ningwul vev? <sup>57</sup> Heva os doa vena, sembayang andranindna kuwul, eva Varisinind doa moamba vivrina heindamba. Hev una, os himba nomba nonorava lohtava, osva ora, ten Yesusva nolhra, heoa ishunda kamo. Wo himba osva ata beswonam hembra kevrivav.

## 12

### *Yesusva Sehelm Innemba Wonnena Betanira. Matu 26:6-13, Mak 14:3-9*

<sup>1</sup> Minguva mongal mendah lohvena, tihva si os ophovav, Pasovatihva. Yesusva gavna Betani kembellam, dom ten Lasarus avnam. Lasarusva noi, ten Yesus pokamarini wolaihaphonam mindil. <sup>2</sup> Wo di himba innemba waihlana Yesusmba, Martava inne leswol vevna. Lasarus hev noi innemba waihlana Yesusmba. <sup>3</sup> Maria welsanda longve, nomba diva os lohmanavna i, wo himba selvowol vevna Yesusna monglamba nona, wo poswol venavna henga hevna tana, hivhoalmba. Wo nomba teihnungva besalva devmorava ambo ningiwulvna.

<sup>4</sup> Yutas Iskariot, mongo Yesustindirini, himba di avnata eva. Himba noi, sewonamba he si Yesusmba holvorahunvav ungrundmba. Yutas ona, <sup>5</sup> honamba welsandava diva mara os lohmanavna K300. Ata eva mama dinasvom indhanam vrahunta, wo diva nomba innehuinindm

moang vinvta. <sup>6</sup> Wo heva os Yutasva ambo dasalm ovna, himba keknamba ninginvnamo a innahuinindmba. Himba ishovna honamba, noinda himba hevpa yukovol lohvna. He disumbva sunguwulavna, wo himba nomini yukov velohvna diva.

<sup>7</sup> Yesus ophona, aambu, hemoa ambo novangas sihavra. Himba lehra temba vev, hona welsandamba lungulamana vena khui, veiva, daipota men, kanamba nihmba kokolma vrelmba, singvelmba sewonam lehei. <sup>8</sup> Innehuinindva si elsus yemba pulningewuvmona vevra, wo heva os yimba kamba si elsusva waieuvmona vevramoa.

<sup>9</sup> Indkumbiva Yutanindva ahalovna, osva ona, doa men Yesusva av Betanira, wo doa himba provna heindamba. Wo heva os himba Yesusmangasmba nonglalmba ambvnamoa. Owai, himba nonora lovahvna, una, nemetva Yesusva wolaihaphona pokamarini Lasarusmba, wo himba eva nonglalm vivnata Lasarusmba. <sup>10</sup> Wo nonawusra sembayang andranindna kuwulva moamba vivrivna, helvakomandhalmba Lasarusmba evata,

<sup>11</sup> manara, Lasarusm nunclinam hevna novna, wo noinda indkumbiva Yutanindva henaminiva anginvna, Yesusmangas keknamba tovopethamnavna.

*Yesusva King Kuwulmsna Sihana Yerusalem-rava.*

*Matu 21:1-11, Mak 11:1-11, Luk 19:28-40*

<sup>12</sup> Mongnasiva indhanamba plombmsnamba diva livnamba Yerusalemba, ahalona, ona, doa ten Yesusva prov domba. Hind noi, ten prowonam

Pasovatihram. <sup>13</sup> Wo himba naiti manimani noi vrvavnamba, nona kangawonga vruwulangavna, nonam suwihalm Yesusm monaram. Hev dand-wonam opelpanganam,

Hosana, okulu Sesoam. Sesoa awothov hembra, himba memba provpa mendeklina nihillava. Sesoa awotho pina Israelnindna king kuwulmoa. *Buk Song 118:25-26*

<sup>14</sup> Yesusva omnanamba, donkiva nosra gana. Doaramini Sesoana tombaimorava os novol velohv,

<sup>15</sup> Ata ye pem vivav Yerusalemnind. Yenamba king kuwulva ten prunv. Himba donki bim-bella ovhoana, nosra prov. *Sekaraia 9:9*

<sup>16</sup> Seilmba hevtindiva tit vivna hona moana plalmba. Heva os venamba, Yesusva phonamba pokamariniva, nonamba Sesoava hevna pusambanakambara hembra desvhoana, wo himba henga ningna, ova honamba novol velohmanav hembra. Wo himba ningna nomba, ova kava doa vinina honamba hembra.

*Indhanamba Monglava Eishomnavna Yesusm.*

<sup>17</sup> Indhanamba esvema pulundvund vevna, nonamba Yesusva deuhvhovnamba Lasarusmba mindilva, omnavnamba, pholahangalmba pokamariniva. Wo doa himba vinamba, moamba vruwul vinvna owalmba, ova ona, Yesusva os vei. <sup>18</sup> Wo indhanamba ahui vevna, nonglalmba Yesusmba, noinda himba hillivnamba nom mendekliandram.

<sup>19</sup> Wo Varisinindva hevm eishovna, una, memba pimba alhuvpa honi Yesusna mendekliandarava, ambo pimba seposa uv

moalm. Manara, indhanamba pethanindva indkumbiva doa hemangas pelpethamnav.

*Yesusva Ishunna Hevna Dahalmom.*

<sup>20</sup> Eva diva monglava Griknindva doara lovahvna, himba sembayangm ambanamba Pasovatihram Yerusalemram Yutanindmongom.

<sup>21</sup> Himba anga Pilipindam, Pilippa nomba Betsaita kembellini Galili provinsrini. Hev umnina, mendekli, kava nonglalm viv Yesusm. <sup>22</sup> Pilip ishomna Endrum. Wo Pilipi Endrui ihishomnana Yesusmba.

<sup>23</sup> Wo Yesusva unna, doa nambaiva phoi, arana ombolva ata hevna pusambava levrholothunvav. <sup>24</sup> Heva os kamba si boasna dahavav. Memba os, maim oi, indhanarini witkul koko vev osora. Witkulva koko veperava petharamba, braovevav. Wo kulva esvemava kethavra. Wo heva os hembra braovemba owai vellava, wo osva himba si esvemava kethavavmoa nihilva.

<sup>25</sup> Himba nomba hevmangasva duus vrevrava, himba si owolakohavra. Heva himba nomba hevna undmba popeng vrelmba owai vevrava hona petharava, si himba wohlohvav yunalm.

<sup>26</sup> Himba nomba kamba andra vinivrava, heoa kam engivra. Wo kana andranindva si wai-vivra kamba, hivemava eva kava avra. Kana ara si okolawol vevra, himba nomba kamba andra vinivrava.

<sup>27</sup> Daipotava kamba doa kin yuhle. Ata eva kava es ovav? Os ata kava ovavma, ara, kamo a kolvro, kamba dahavavmoa. Owai, kava prov men honanam, os kava manapenam kinmba guavra.

<sup>28</sup> Ara, yeoa pevna pusambamoa ambara levra-holotho. Wo moalamang ophona senamini, kava doa venata, wo eva si henga kava vevav.

<sup>29</sup> Wo indhanamba nomba di pulundvund vevnamba, nomba moalamangmba hillivna. Wo himba os uvna, hul ov. Wo heva os monglava os uvna, ovsongolnindrini hembra ishomnav.

<sup>30</sup> Yesus unna, no moalamangva temba yem, kamba owai. <sup>31</sup> Daipotava memba Sesova

doa yem pethanindm lesvhoawolalm vev. Wo doa daipotava himba si wulengva piangavav pethanindna kuwulmba Setanmba. <sup>32</sup> Si boasna kamba sena wukleihivav, wo nonamba kav indkumbim si os nembraomana vevav kaindava.

<sup>33</sup> Yesusva ishuvna honamba, osm ora, si os kamba dahavav kruserava.

<sup>34</sup> Wo indhana noi avnam, hev umnina, kava hillina lohohmorava, os Kristusva si yunalm wohavav. Wo manara yimba oi osva, arana ombolva si dahavav? Wo an nomba arana ombolva?

<sup>35</sup> Wo Yesus ophona, upsilva si yemba wonasambaihavav. Wo beswonam lohmana vevm, nonamoa upsilva lohvrava. Wo ata homeis sia yem kekaiv vevm. Himba nomba sikulmonamba lohmana vevrava, himba tit vev, osva kava henamonam gav? <sup>36</sup> Wo noinda

osva yeoa keknam undnahonam lovahthamno kam, mendahva kava yemba wonavrava. Wo osva yimba si upsilna towandaslalnonoa avav. Nonamba Yesusva honamba osva ishopianamba, himba os gana, kokmondha vrevna hevmba indhanakomonam.

*Yutanindva Mindnam Keknamba Undnahonamba Lovahthamnavnamoa Yesusmba.*

<sup>37</sup> Eva Yesusva doava mendekli andrava vinvna indhanana novrava, heva os owai, himba mendah keknama lovahthamnavnamoa Yesusmba. <sup>38</sup> Memba honamba nom, temba Aisaiava moashulnindriniva ishonamba, himba wohengivna. Os novol velohv,

Mendekli, anmund kek vithiv honamba moamba, kava memba ishuvpa hembra? Anmund nunglina doava yena andrasowolva, wo he una, honamba phov Sesoanaminiangas? *Aisaia 53:1*

<sup>39-40</sup> Wo mongmomba Aisaianamba eva novol velohv os,

Sesoa doa no indhanana novm ehlothowol vinvna, wo hev hena nengavnangm indkokla vrowol vinvna. Sesoava oswa owai vewol vetava, wo himba beswonam novvivavta, wo beswonam ningvavta, wo kava hembra sishona vrowol vevav, heva os owai. *Aisaia 6:10*

<sup>41</sup> Aisaiava ishona os, manara noinda himba doara heva nonglana Yesusna pusambakambamba, wo eva hem doara ishomnavna. Hev unna, Yutanindva owai, Yesusmba undnahonamba keknama lovahthamnavmoa.

<sup>42</sup> Wo heva os monglava keknam undnahonam lovahthamnavna Yesusmba, eva nomba Yutanindna kuwulva mindnam. Heva os Varisinindnapenamba himba oswa uvnamoa, kava keknam undnahonam lovahthamnav hembra. Himba pem vivna, osra ata kamba wolapulvo vevav sembayangdiniva. <sup>43</sup> Himba undva os vivrivna, indhanaoa kamo a okolawol

vivra, himba ova ningvnamoa, Sesoa kamao okolawol vevra.

<sup>44</sup> Wo Yesus dandwonam ophona, yimba himba nomba kamba undnahonamba lovahthamnavrava, yimba tanam eva undnahonam lovahthamnavrata hem, nomba temba himba kamba homba wolaihapanamba.

<sup>45</sup> Wo himba nomba kamba nonglavpa, wo eva himba nomba nonglavta, temba himba nomba kamba wolaihapanamba.

<sup>46</sup> Kava pusambamsna prona hona petharamba. Kava osm prona, himba nomba kamba undnahonamba lovahthamnavrava, si avavmoa sikulmonamba. <sup>47</sup> Wo himba nomba kana moamba hillivrava, wo engwol vivramoa, kava hembra nomba lesvhoawol vevramoa. Noinda kava lesvhoawolalmba prunnamoa pethanindmba, heva os lopshalm pethanindm.

<sup>48</sup> Heva os lohvta, lesvhoawolalmba hem, nomba temba ningvmoa, keknamba kamba lovahthamnalmba, eva vreivmoa kana moamba. Moamba nonamba kava numhowol vevpa, temba hem lesvhoawolalm, ovi pethai hoai evewolvram.

<sup>49</sup> Kava nonamba memba numhowol vevpa, kanamba kavnaminiva owai. Ara noi ten kam wolaihapanam, ishomnana kamba, osm ishunilm, eva osm numhowolalm, ara ten ishovm.

<sup>50</sup> Wo kava wiyera av, ova undva almba yunalmba nomini prov, ara ten ishovm. Wo noinda ova nomba temba kava ishovpa, ara kamba wuhhov, isholmba nomba.

## 13

*Yesusva Hevtindina Monglam Poswol Vinna.*

<sup>1</sup> Doa Yutanindna Pasovatihva mumra vinvna. Yesusva nengna, doa kanamba nambaiva mura vev, pholmba hona pethariniva, wo hengam galm araindam. Himba elsus und vewol vevna hem, nomba hevnanonoamba hona pethariniva, wo himba osangas wohund vewol vawovna, verava, dahara. <sup>2</sup> Doa venamba, okombava pelangalla avnamba, Yesusva wonnevna innemba hevtindimba. Setanmba doa doara wuhhona Yutas Iskariotmba, Yesusmba ungrundmba novpa wolaihanilmba. Yutasva nomba Simonna ombol. <sup>3</sup> Yesusva nengna, os manimani doa aramba kana englara hohlona. Hev vena, os nengna, kava prona Sesoanamini, wo henga kava si gavav Sesoaindam. <sup>4</sup> Wo wonnevnamba, Yesusva phonamba, lohvhova, wo selvlahanamba hevna kayen ambariniva, doa handuk moan vranamba, hevna mutengra mokaltha. <sup>5</sup> Wo hev vranamba, baketra po sovho, wo doa osoa poswol vinvna hevtindina monglam nona. Wo no handukna sowol vinvna, hivhoawolalm, ten hev mutengra mokalthanam. <sup>6</sup> Doa venamba, ona phona Simon Pitainda. Wo Pita omnana Yesusm, mendekli, es hevpa yimba ata kana monglava poswol vevavma?

<sup>7</sup> Yesus ophona, yimba levrapiavmoa honamba, kava memba vevpa daipotava. Heva os yimba si sewonam lihavav. <sup>8</sup> Pita omnana, owai, yimba ata kanamba poswol vevavmoa monglava. Wo henga Yesus ophona, kava yenamba monglava poswol vemba owai vetava, kalmba yimba owai. <sup>9</sup> Simon Pita henga ophona, yimba kanamba monglava poswol vipiarava, wo kana veo, englam poswol



veo, kum posvo.

<sup>10</sup> Yesus henga omnana, indhanariniva porava dalohpiarava, wo henamba nihva besal lohv. Wo himba hengava monglamangas poswol velmangas vev. Wo yimba indhanariniva nihvuhinhui, heva os yimba indkumbiva owai. <sup>11</sup> Yesusva doara nengna, osva ona, hanoi ata kamba novpa wuleihinvav ungrundmba. Temba noinda Yesusva osva ona, yimba indkumbiva nihvuhinhui, heva os yimba indkumbiva owai.

<sup>12</sup> Nonamba himba monglamba poswol vepieinnamba, doa himba henga hevna kayen vethanamba, ovhoa. Yesus osihinna, yimba doa levrapivolima, memba daipotava kava viniva yemba? <sup>13</sup> Yimba kamba alv, os guru, eva os, mendekli. Wo memba lehra, manara noinda kava memba osmta lohv. <sup>14</sup> Ka yena mendekli eva guru, poswol vini yena monglamba. Wo yeoa eva os poswol vinvm pevna mongawa Kristusnindna monglamoa. <sup>15</sup> Kava memba lihini yemba, osm yeoa os viluwulkovo.

<sup>16</sup> Kava ishunv yemba tanam. Andranindriniva mendekliva owai hevna duangnamba. Indhanariniva gavpa, himba senamba avmoa hanoi-indava, temba himba hembra wolaihangnamba. <sup>17</sup> Yimba liheitava honamba, memba kava veiva, yimba si indk vithivav, yimba osangasta vinvrava pevna mongawa Kristusnindmba.

<sup>18</sup> Kava ishunvmoa yemba indkumbimba. Kava lihawol vev nomba, temba kava kikih vewol vevnamba kavalmba. Heva os temba doaraminiva tombaimorava lohvpa, os kava wohengvra.

Indhanariniva memba neiva kana meyarava,  
 himba doa kamba indkokla vrei. *Buk Song*  
*41:9*

<sup>19</sup> Kava ishunv yemba honamba doara, si os ve-  
 vav sewonamba. Wo nonamba vevrava, yimba  
 si levrapieivav, osva kava he. <sup>20</sup> Kava ishunv  
 yemba tanam, himba nomba omnatava hem  
 nomba, temba kava wolaihangavrava, os um-  
 nivra kamba. Wo himba nomba omnavrava  
 kamba, wo eva omnavrata hem nomba, temba  
 himba kamba wolaihapanamba.

*Yesusva Ishunvna Hevna Dahalmom.*  
*Matiu 26:20-25, Mak 14:17-21, Luk 22:21-23*

<sup>21</sup> Yesusva honamba ishopianamba, doa kin-  
 mba hembra sna venavna i. Hev moakus unna,  
 kava ishunv yemba tanam. Mongo honi yerini  
 ata kamba ungundmba novpa wuleihinav. <sup>22</sup> Wo  
 hevtindiva di hevm novna anongla vevna. Himba  
 tit vivna, osva anm ishomnav Yesusva hevpa?  
<sup>23</sup> Mongova hevtindiriniva doara di mura avna  
 Yesusinda. Wo hem nomba Yesusva mindnam  
 hembra und vevna. <sup>24</sup> Simon Pita ahalnovna  
 venana, sahmanalm Yesusm, anm hevpa yimba  
 nomba temba ishomnav?

<sup>25</sup> Wo himba temba murava avnamba  
 Yesusindava, nonglanamba, sahmana, an hevpa  
 si yemba ungundmba novpa wuleihinav? <sup>26</sup> Wo  
 Yesus ophona, ata kava hona rotiva neluspora  
 velthavav. Wo ata kava hem nom vraohvav,  
 henoi ata kam ungundm holvorahunvavm. Wo  
 Yesus roti vre, wo hev neluspora velthanamba,  
 vraohe Yutas Iskariotm, Simonna ombolm.

<sup>27</sup> Wo doa Yutasva vrvavnamba rotiva, Setanmba hembra wuhho ovrvavna lilnam. Yesus omnana Yutasmba, nomba yimba temba ata vevavpa, lelnam veo. <sup>28</sup> Mongova owaimomolmba levrapivongovnamoa, nomba temba meyarava aevulvnamba, osva manaram Yesusva omnav Yutasmba osva. <sup>29</sup> Heta disumbva sunguwulamana vevna, wo monglava hevtindiva os ningvna, Yesusva ishomnav Yutasmba, mana vemam so-vawolalm hona Pasovatihram. Hev vevna, os ningvna, Yesusva Yutasmba nengmanav, os daswolalm manimani monglamoa innehuinindm. <sup>30</sup> Wo Yutasva wohvrangas vev nomba rotiva, Yesusva temba vraohnamba, wohpholahangav lelnam amballam. Doa sinim memba vivna.

<sup>31</sup> Nonamba Yutasva pholahanganamba, Yesusva unna, pusambava kanamba ata daipota indhanamba nunglivav. Wo osva Sesona pusambava nunglivavta. <sup>32</sup> Kava ata Sesoa arana pusamba ambara levraholothovav, wo ara ata kana pusambava ambara levraholothovavta, wo lilnam ata vevav. <sup>33</sup> Yesus unna, kana otol, kava ambo ata yemba wonasambaihavav. Yimba si kamba aslaluwuvav, wo temba kava ishunnamba Yutanindmba, men kava yemba ishunv. Domba kava gavavpa, yimba domba ambvavmoa. <sup>34</sup> Kava vrahunv yemba nemel moamba. Undnahonam und avramana vevm monglamoa. Yeoa und vewol vivm monglamoa, os men kav yem und vewol vevnam. <sup>35</sup> Indhanamba indkumbiva si nungeilvra, osva yimba katindi, yimba und vewol vivrava monglamba.

*Pitava Ata Os Owovav, Kava Tit Venav*

*Yesusmba.**Matiu 26:31-35, Mak 14:27-31, Luk 22:31-34*

<sup>36</sup> Simon Pita osahmanana Yesusm, hem yimba galmba vev? Yesus omnana, memba domba kava ongovpa, yimba kamba domba patvmonavavmoa daipotava. Yenamba sewonam. <sup>37</sup> Pita henga sahmana, manara ata kava yemba engpramba owai vevav? Kava eva dahalm ovta yeindava. <sup>38</sup> Yesus ophona, si ambo tanam yemba dahavavma kaindava? Tanam, ayamba ata os ophovav, yimba ata samblamongolm osva owovav, kava tit venav Yesusmba.

**14***Yesusva Ishunvna Hevtindim, Monamba Dihelgalmba Araindamba, Men Kangas.*

<sup>1</sup> Yesus unna, manam yenamba undva potrava pihangu vinvav. Owai, Sesoamangas undnahonam lovahthamnavm. Eva undnahonam lovahthamnavm kam. <sup>2</sup> Diva kana arana devrava mindnam vuhemba luhungu vev. Owaingava, kava ata ishunvavmoa honamba yemba osmba. Kava domba vuhem pongvhueinilm yem geinv. <sup>3</sup> Kava vuhemba pongvhueindava, wo henga kava si provav. Wo kava yemba wongavav kavalm, osm yimba di aevulvra, ten kav avm. <sup>4</sup> Yimba nonora lovahv monamba, no kembelamba memba kava gavpa.

<sup>5</sup> Tomas omnana Yesusm, kava tit viv, yimba domba temba gavpa. Wo es hevpa eva kava liheivav monamba? <sup>6</sup> Yesus omnana, monamba araindamba men kangasta. Moanonoana plalva menta kava kav. Wo kaindangas indhanamba

tanamba undnamba av. <sup>7</sup> Yimba beswonamba kamba levrapiatava, eva yimba osva levrapiavavta kana aramba. Wo heva os daipotava yimba doa hembra liheiv, wo eva yimba doa nunglina hembra.

<sup>8</sup> Pilip omnana, indthueinu kam arapevm. Honamangas kava mindnamba ningv. <sup>9</sup> Yesus ophona, Pilip, kava eva omhonianam wonamana venama, wo heva os yimba kamba mendah tit vrivna? Yimba himba nomba temba kamba nonglanamba, eva aramba nonglanata. Wo manara yimba ovna osva, indthueinu kam arapevm? <sup>10</sup> Yimba wiyera avma, osva kava aramera av, aramba kamera av? Wo moamba nomba kava yemba temba ishunvpa, kanaminiva phovmoa. Ara kaindava av, wo himba hevna andra vev kananamba. <sup>11</sup> Yeoa keknam kek vithivm, memba kava osva oiva, kava arainda av, eva aramba kainda av. Owaingava, nom nunglivm, mendekliandram, nom ten kava vaomana vevnam, wo osva yimba honamba kana moamba kek vithivav.

<sup>12</sup> Kava ishunv yemba tanam, yimba himba nomba keknamba kamba lohmanavrava, si vevra manimani, os ten kav vevnam. Himba si vevra snamba eva mendeklikumbiva mana vemava osva, noinda kava gav araindam. <sup>13</sup> Wo yimba sahmanavrava mana vemava kana nihilnamba, kava si wohvengas venavra yemba. Wo osva kava Sesoa arana pusambava ambaram levraholothunvav. <sup>14</sup> Yimba sahmanavrava mana vemava kana nihilnamba, kava vengas vevra.

*Yesusva Os Ona, Kava Si Sesoasongolmba Yemba Wolaihaprinvav.*

15 Yimba kamba undva vitava, yimba si vivra manimani, nomba temba ishovnamba kava. 16 Kava si aramba sahmanavra, wo himba si yemba mongom indhanarinimba wolaihaprinvav. Himba honana si yemba kolvrowol vevav, wonalm yunalm yem. 17 Nomba kokoldombnindriniva Sesoasongol, moanonoam nom wulluhvm Sesoana. Pethanindva si hembra patvmonavavmoa, noinda nunglivmoa hembra, eva liheivmoa hembra. Wo heva os yimba liheiv hembra. Himba wonav yemba, wo himba si einvra yeinda.

18 Kava si yemba bumb vewol velahangavavmoa, osva ora, otol hevho aevulv tengul, owai. Kava henga si prunvav yeindamba. 19 Wo mani wenokombawonamma pethanindva hengava si kamba nunglivavmoa, heva os yimba si nunglivav kamba. Noinda ka wohavra, eva ye wohae-vulvra yunalm. 20 Wo no nambainamba yimba si os wiyera avav, kava doa arainda av. Yimba si nomba wiyera avav, manara, yimba kainda aevulv, eva kava yeinda einv. 21 Yimba himba nomba kana moamba levrapiolvrava, wo engivrava, kava si os lihawol vevav, yimba noi, temba kam und vivm. Wo kana ara si und vewol vevra hembra nomba. Kava si hembra und vevrava, wo kavm holvonethamnavav hembra.

22 Wo Yutas mongo, Iskariotva owai, omnana, heva os mendekli, esra hevpa yimba onengv, osva yimba holvonithinvav pevmba kamba, heva pethanindm indkumbim owaiva? 23 Yesus ophona, himba nomba kamba und vetava, wo osva himba kana moamba engvra. Wo ara kana

hembra und vevra, wo kava araiva heindam epravra, wo deuv wulphovra kava heindava. <sup>24</sup> Himba nomba kamba undmba owai vevrava, eva owaita, kana moamba engvmoa. Honamba moamba yimba memba hillivpa, kanamba kavnamba owai. Memba kana aranamini, ten kam wolaihapanam.

<sup>25</sup> Kava doa ishomana vinna manam manam yunalm honamba yemba, nonam yem kav wonamana vevnam. <sup>26</sup> Heva os kokoldombnindriniva si yemba numhowol vevra, osva manam manam. Himba si otuhtwol vevra yemba, nengalm nom manimani, ten kav yem ishunvnam. Honamba kokoldombnindriniva Sesoasongol, hembra Sesoa si wolaihpravav kana nihilnana. <sup>27</sup> Kava yemba sandhalahangav. Kavna yemba undwonamba wonvev. Pethanindva yemba ondeiswiv, undwonamba wonvelmba. Wo noinda osva manam yimba pevna undmba potrava dembhapuv vevav owai. Manam yimba pemba vivav. <sup>28</sup> Yimba kamba hilli, yemba kava ishuni, kava gav, heva os kava prunvav henga yeindamba si. Yimba kamba und vetava, yeoa indk vithu, osoa kava henga gav araindam, noinda himba mendeklinonoa, kamba kuvhoav.

<sup>29</sup> Doa kava honamba yemba men ishuni, si os dawonamba vevav. Wo nonamba osva vevrava, yimba si nunglivav, osva Yesusva tanam ona honamba. <sup>30</sup> Kava ata yemba mindnamba wonishovavmoa, noinda Setan kuwul hona pethariniva doa proi. Heva os himba hevnasowonamba mana vemava kamba venavavmoa. <sup>31</sup> Pethanindva honamba si nunglivrava kanamba dahalmba, si os

levrapivolvav, osoa kava aram undva vev. Wo kava nongas wohvev, ten ara kam omnanam, nom velm. Dowau, doa angalohra pioa honaminioa.

## 15

### *Yesusva Wainwosalmsna Livna.*

<sup>1</sup> Yesusva nomba moamba mendah nui vrinvna osva, kava kavpa tiwosalnonoa. Wo aramba kanamba tiwosal osona aral. Nomba weselva os ningthiv, wainwosal. <sup>2</sup> Vavawonamba klavoklalva kanamba wohlundthoavavmoa movolnamba, wo nomba snamba ara helvahanga vev. Vavawonamba klavoklalva temba wohlehra vethavpa movolnamba, wo aramba helvahanga vev soulalangas, os besalangas lohvra, osm elsusva himba mindnam prowovra. <sup>3</sup> Yimba doa woranihilangas av. Honamba moamba kava memba yemba ishuluhuvnamba, memba osm yimba doa woranihilangas phovhoai. <sup>4</sup> Yeoa kaina pepavo, eva kava yeinda petheinv. Tiwosalna klalva lulamba owai vetava hullava, osva nomba klalva movolva kethavramoa. Heoa heva lulavra hulla. Eva yimba osta, yenamba movolva kethavramoa kahuiva. Yeoa kaindangas pepavevm.

<sup>5</sup> Kava wesel hul, wo yimba kana klavoklal. Indhanariniva kaindava wohpethatava nihrava, eva kava heinda wohpethavavta nihra, wo himba movolva osva mindnam kethawovra. Wo heva os kahuiva yimba mana vemava vevavmoa. <sup>6</sup> Himba nomba kaindamba nihrava pethamba owai vevrava, wo himba nomba temba snal, tikla, noi ten helvahanga vivm. Wo klavoklalva



soulongavra, wo indhana soulalva dumbvra, suveram pingipuv vevra, suwem talm. <sup>7</sup> Pepavo kaina nihra, wo engivm kana moam. Yimba vetava honamba, wo mana vemava yimba ningvrava, sahmanalmba, wo ambo yimba novoa vinvra. <sup>8</sup> Yenaova movoloa esvema opihiluhunda, wo ova nungeilvra yemba, yimba katindi av. Yimba honamba ova vivrava, indhanamba aranamba pusambakambamba nunglutithoavra.

<sup>9</sup> Kava und vewol vev yemba, os ara ten kam und vevm. Wo doa wohpepavo kaina nihra, wo ova si kava yemba und vewol wohvevra. <sup>10</sup> Kava wohhellengas vena kavna arana moamba, wo noinda himba kamba wohund vev. Wo yimba eva vetava ova, kana moamba engitava, yemba kava si und vewol wohvevra. <sup>11</sup> Kava ishunv yemba honamba, osm yimba indk vithivra, os men avm kav nona. Kava ninginv yena indk vethalm, osm yemoa pilivhoawol vera.

<sup>12</sup> Men kanamba moamba, und vewol vivm monglamoa, os men kav yem und vewol vevm. <sup>13</sup> Mendekliva und vewolal, indhanariniva mon-gova daheintava hevna sehelmba. <sup>14</sup> Yimba kana sehelnonoa, yimba vetava, ova nomba memba kava ishunvpa yemba. <sup>15</sup> Kava yemba sevelov-moa ova, andranind. Manara, andranindriniva tit vev, nomba hevna duangva temba nengvpa. Wo heva os kava daipotava yemba os sevelov, seh, noinda kava doa yemba iana, nonamba temba kava hellevnamba araindava.

<sup>16</sup> Yimba kamba kiki vrinamo, ka yemba kiki vewol vena. Wo ka daswolna honamba andrava yemba, bukithengu velmba, movolmba

kethapralmba. Kava ninginv yemba, kethapralm movolm, osm noi si yunalmba lohvav. Wo aramba si manimani yemba daswolvra, yimba osihminivrava hembra kana nihilnamba. <sup>17</sup> Men honamba kanamba moamba, yea undalm vewol vivm monglamo.

*Yesusva Hevtindimba Lohohsama Okilithinna.*

<sup>18</sup> Pethanindva indkumbiva yemba sahonamba vinvrava, ningvm os, himba miva kamsna vinivna. <sup>19</sup> Yimba hona pethanindriniva atava, wo yemba und vivra, os ten hev vivm. Wo heva os kava doa yemba kikihi vewol vena, pulvolmba hona pethariniva. Wo noinda osva yimba hona pethariniva owai. Wo memba noinda pethanindva yemba vinv sahonamba. <sup>20</sup> Keknam ningvm honam, men kav yem ishunvm. Ombandhana andranindriniva himba mendekliva owai hevna duangnamba. Indhanamba kamba sahonamba vinitava, eva himba si vinvrata yemba. Wo himba engivrava kana moamba, eva himba si enginvrata yenamba.

<sup>21</sup> Himba si vinvra manimani honamba yemba noinda kaina. Manara, himba lihevmoa, nomba himba temba kamba wolaihapranamba. <sup>22</sup> Kava promba owai vetava, ongawolalmba hembra, ata Sesova hembra ishuntamo, osva yimba indkokla vina. Wo heva os daipotava himba novtotholmba osva uvavmoa, osva kava indkokla vinamo, manara, noinda kava doa hembra ongawolna. <sup>23</sup> Himba nomba kamba vreipra vritava, eva himba aram temba vreipra vritva.

<sup>24</sup> Manara, kava andrava vinvna hovrahovra heindava, osva an eva doava vena. Kava doarava

owai vetava, velmba nomba andrava, Sesoava ata hembra ishuntamo, ova yimba indkokla vina. Wo heva os daipotava himba doa nunglina, nomba temba kava doava venamba, wo heva os himba mendah vreipra verumbtv kamba araimba. <sup>25</sup> Heva os memba honamba osm vena, os novol velohv lohohmorava, os, Himba ambo kamba nis vreipra vrina, moamba lohvnamoa. *Buk Song 35:19, 69:4*

<sup>26</sup> Kava si wolaihaprinvav yemba kokoldombnindrinim kavna aranaminiva. Himba Sesoasongol, himba wulav moanonoa. Nonamba himba provavpa, himba si ishunvra kamom yemba. <sup>27</sup> Wo eva yeoa eishunvm indhanamo, kamomoa, manara noinda yimba doa kamongo euvmona vena, di hevm kav andrava seilm kovonevnam, eva veiva, daipota men.

## 16

<sup>1</sup> Kava ishunv yemba honamba, osm keknam avm honindao. <sup>2</sup> Indhanamba si wolapulvo vevra yemba hevna sembayangduvriniva. Si nambaiva provav, nonamba himba nomba yemba helvakomolmba vivrava, wo himba si os ningvra, kava memba sembayang venalm venav Sesoam ova. <sup>3</sup> Himba si os viwul vevra honamba, noinda himba owai, liheivmoa Sesoamba aramba, eva hev vei, liheivmoa kamba. <sup>4</sup> Kava men yemba ishunv honamba. Wo nonamba honamba nambaiva provrava, yimba si ningvra, ova himba doara doa pimba unna.

*Sesoasongolna Andra, Kristusnindm Suwem-sna Tavra Kilihawolalm.*

Yesusva mendah ishunvna, kava ishunnamo  
honamba yemba, manara, kava nihra wonvevna  
yemba. <sup>5</sup> Heva os daipotava kava henga gav  
dom, henoi ten kam wolaihapranam. Wo heva os  
mongova yimba osahmanimoa kamba, osva hem  
yimba gav? <sup>6</sup> Undva yenamba doara potra pi-  
haprini, noinda kav honam ishunim yem. <sup>7</sup> Heva  
os kava ishunv yemba tanam. Memba hevm  
besal, osva kava yemba sandhalahangav. Wo  
nonamba kava wohgavrava, kava si wolaihaprin-  
vav kokoldombnindriniva yemba. Kava gamba  
owai vetava, wo eva osva si kokoldombnindriniva  
provavmoata.

<sup>8</sup> Nonamba kokoldombnindriniva provrava,  
himba si os pethanindnamba ambaramba  
wulphunvav, vei, hevna wevsakoklam, eva  
monam, osm Sesoana novrava himba lehra  
wohavra, eva osoa Sesoana lesvhoawolallava.  
<sup>9</sup> Himba indkokla vina, manara, himba kamba  
owai, keknamba amnavnamoa undnahonamba.  
<sup>10</sup> Wo himba si lehrava avra Sesoana novrava,  
manara, kava gav araindam. Yimba si  
nunglivavmoa hengava kamba. <sup>11</sup> Wo  
kokoldombnindriniva si novpa wuleihinav  
hemba, osva Sesoana lesvhoawolalmba  
tanam lohv, manara, hona pethanindna  
kuwulva Setanmba, doa himba owolakohana  
wetatmorava.

<sup>12</sup> Kava mendah men moamba ieinv, yemba  
ishunilmba, heva os owai, mani eva eskandma.  
<sup>13</sup> Wo heva os nonamba Sesoasongol provrava,  
himba si yemba deisumbi lohmana vevra  
moanonoaram, manara, himba hevpa wulav  
moanonoa. Himba si ishovramoa hevna

moamba, himba si ishovra moamba, nongas ten hev hellevram, wo si ishunvra yem nom, mani si provav.

<sup>14</sup> Sesoasongolva si kana pusambakambamba ambara levraholothunvav. Noinda osra, himba wulprovav kana moamba, wo ishunvav yemba.

<sup>15</sup> Wo nomba manimani aramba temba iavpa, kana. Wo noinda kava ov memba ova, Sesoasongolva si wulprovav kana moamba, wo ishunvav yemba.

*Yesus Unna, Seilva Yenamba Si Undva Potra Piheinvav, Heva Os Sism Yimba Si Losnamonamba Owovav.*

<sup>16</sup> Hev unna, doa mumra vev, osmba yimba si kamba nunglivavmoa hengava. Wo henanam henga yimba si nunglivav kamba. <sup>17</sup> Monglava hevtindiva hevm asahmana ungu vevna, esm hevpa memba Yesusva ova oi, mani wenokombawonamma, yimba si nunglivavmoa kamba, wo heva os eva mani wenokombawonamma, yimba si nunglivav henga kamba? Wo esm memba hevpa ongei himba, manara noinda kava gav araindam? <sup>18</sup> Wo henga hevm asahmana ovnam, esm hevpa ova oi, doa mumra vev? Kava levrapi-volvmoa, himba nomba temba ishovpa.

<sup>19</sup> Yesusva nongalna hevtindimba, ningv, sah ovralm honamba kamba. Wo doa hev unna hevtindim, yimba pevm asahmana ovma, nom men ka oim, os mani wenokombawonamma yimba si nunglivavmoa kamba? Wo henanam mani wenokombawonamma yimba si nunglivav henga kamba? <sup>20</sup> Kava ishunv yemba tanam, yimba si wenumbsna avav, heva os indkumbiva

pethanindva si indk vithivav. Yemba si ksu-  
vhoapravav weselmsna, wo heva os honamba  
yenamba si nilhaprinvav, indk vethalm.

<sup>21</sup> Nonamba ungevlininiva otolmba lengvrava,  
hembra nihsesoava sna venavra i, noinda doa  
nambaiva phoi, otolmba lengalmba. Wo heva  
os nonamba henamba otolva lengpevrava,  
himba henga nihsesoava maivethavra. Himba  
maivethai, noinda himba wohindk vethai, noinda  
otolliniva doa kava lengei. <sup>22</sup> Eva yemba osta,  
daipotava yimba wenumbsna av. Wo heva os  
kava si nongalvav yemba henga, wo yimba si indk  
vithivav. Wo indhanariniva mongova si hiluvla  
vewol vinvavmoa yenaminiva indk vethalmba.

<sup>23</sup> Nonamba yimba si kamba henga nungli-  
vav, yimba si osihminivavmoa kamba mana ve-  
mamba. Yimba si aram seihminivra. Yemba  
kava ishunv tanam, ara kana yemba si daswolvra  
mana vemava yemba, yimba osihminivrava kana  
nihillava hembra. <sup>24</sup> Nemet doara, veiva, daipota  
men, yimba osihmininamoana mana vemamba  
kana nihillava doava, owai. Osihminivm, yimba  
si dumbvra. Wo yenamba indk vethalmba si  
pilivholuhunvra emerava pomsna.

### *Yesusva Doa Nombs Pipahana Kikpulva Hona Pethariniva.*

<sup>25</sup> Kava doa ishunna yemba honamba manam  
manam, inelmonamba. Wo heva os nambaiva si  
provavpa, nonamba kava si sna moamba ishun-  
vramoa yemba mana vemamba. Kava si ishunvra  
yemba ambo bambanam arana moamba. <sup>26</sup> Wo  
no nambainamba yimba si osihminivra aram  
mana vemamba kana nihilla. Kava ishov, os

kava si owai vevra, aramba sahmanalmba mana vemamba yemba. <sup>27</sup> Owai, aramba hev himba yemba und vewol vev. Himba und vewol vev yemba, manara, yimba und vivpa kam. Wo himba und vewol vev yemba, manara, yimba undna-honam ningvm, os kava henamini prona. <sup>28</sup> Kava prona aranamini hona petharamba. Daipotava kava doa phov pethariniva, henga gav araindam.

<sup>29</sup> Wo hevtindi umnina Yesusm, yimba men daipota bambanamba lehrava kamba ishunv. Yimba inelmonamba ishoimoa, osva kava ata es eva levrapivolta. <sup>30</sup> Kava men nungliv daipota, osva yimba nonorangas lohv. Yimba indhanarinina sah ovralmomba opla vramnavav, osva himba mendah yemba osahmanavavmoa. Honamba kamba numliheinv, osra yimba prona Sesoanamini.

<sup>31</sup> Yesus ophona, osoa yimba daipota men und-nahonamba av? <sup>32</sup> Hillu kam, doa nambaiva murapeta wohvev, nonamba yimba si indakonda pilialowolavav. Yimba indakonda si bukithavra, himba nomba heva hevna deuvkembellam gavra. Nomba nambaiva doa men. Yimba ata dasva buovav kamba. Heva os kava kavhova ata gavav-moa, manara, ara hev kamba waiav. <sup>33</sup> Kava ishunv yemba honamba, osm yimba beswonam undwonam avra. Wo hona petharava yimba si kinmba dumbvra, heva os homeis keknam avm. Kav doa hona pethana kikpultovpa nombs pipa-hana.

## 17

*Yesusva Sembayang Vinvna, Kolvrowol Velm*

*Hevtindim.*

<sup>1</sup> Yesusva nomba manam manam ishopieinnamba, doa nov vevongo ve senam. Hev sembayang ovovna, ara, nambaiva doa phoi, yeoa kana pusambamoa ambara levraholotho, osm kava eva yenamba pusambava ambarava holothunvav. <sup>2</sup> Yimba doa kamba vraohna keknasowol, mera velm indhanam indkumbim. Osm kava daswolvra und, nonapopolmba yunalmba almba no indhanamba, yimba temba kamba wolamnamba. <sup>3</sup> Plalva, undva nonapopolmba yunalmba almba, memba osm, indhanariniva yemba lihavra, Sesoanonoava mongal, wo eva no indhanarinim lihavra, Yesus Kristusm, nom ten pev wolaihapranam. <sup>4</sup> Kava andrava doa vepiana, nomba yimba temba kamba omnanamba velmba. Wo osra kava doa yena pusambava ambara levraholothunna hona petharamba. <sup>5</sup> Wo daipotaoa, kanamoa pusambamoa ambara levraholotho pevindam. Nom ten kav ten wulanam yeinda, nemet pethava os yimba venamoa.

<sup>6</sup> Yimba wolamnana indhanamba monglava kamba hona petharini. Kava doa novpa wuleihinna hembra, osva yimba snal av. Wo nomba indhanamba temba yena, wo yimba wolamnana hembra kam. Himba wohengivna yena moamba. <sup>7</sup> Daipotava himba nonora av, osva manimani memba yimba kamba dombraohnamba, prov pevnaminiangas. <sup>8</sup> Kava vrahunna hona indhanamba moamba, nomba yimba temba kam vraohnamba, wo himba wohvreina nomba moamba. Himba nomba nonora av, osva kava tanam yenamini prona.



<sup>9</sup> Kava sembayang vinv hembra men. Kava sembayang vinvmoa indhanamba indkumbimba pethanindmba. Heva os kava sembayang vinv no indhanam, pev ten kam wolamnanam, manara noinda himba yena. <sup>10</sup> Memba kava wonavpa, yena pevhonangas, wo yimba nomba wonavpa kanangas. Wo indhanamba indkumbiva nungeilvrava katindimba, himba si os nungeilvav kana pusambamba. <sup>11</sup> Daipotava doa kava ten prov yeindam. Kava si avavmoa petharava daipotava. Wo heva os hona indhanamba mendah aevulv hona pethara. Ara, yimba sena woheinv, yea wonavm beswonam pevna keknasowol nihilla, noi nihil men pev kam awothonam, wo kava nona memba keknamba wohlohv. Yea vinu hemoa os, osm himba si mongawatindilm avra, os vei, ye ten eva men ka.

<sup>12</sup> Kava nonamba wonavnamba hembra, kava wonavna beswonam yena pevna nihilla, noi nihil ten pev kam awothonam. Kava dandana vewol vevna hembra, wo mongova heriniva si owolakohavavmoa. Mongongal owolakohana, doara aembul wohvena hembra. Himba owolakohana, osmba nomba temba moamba lohvpa doaramini tombaimorava, si os vevav.

<sup>13</sup> Ara, kava doa ten prov yeindam daipotava. Heva os kava sembayang vinv honam kavtindim boasna, mendah men kav avm hona pethara. Kava ishov honamba manam manam, osm hona indhanamba wohlundthoavav kana indkvetalna. <sup>14</sup> Kava doa wohiana hembra yena moanamba. Wo indkumbiva pethanindva hona indhanamba sahonam vinv, manara, himba hona pethanindmba owai, os men ka. <sup>15</sup> Heva

os kav yemba osva osahmanavmoa, yeoa hemoa wolapho veo hona petharinioa. Heva os kava yemba os omnav, yeoa hemoa kokmondha vewol vevm Setannapenamo.

<sup>16</sup> Himba pethanindnamba owai, os men kav, kava eva pethanindnamba owaita. <sup>17</sup> Moamba yenamba tanamolnonoam, wo moam pevnam yivilthinvm hena undraoa, wo himba yem pevelmangasm amnavra honana. Manara, yenamba moamba tanamolnam. <sup>18</sup> Kava doa hembra wolanga vungu vena indakonda petharamba, os men ye kam wolaihpranam hona petharam. <sup>19</sup> Kava doa ophona kavmba, yemangasva nonamba amnalmba. Kava vinv honamba hem, osm himba tanam plasra aevulvra, yemangasm amnalm.

<sup>20</sup> Kava sembayang vinv hona indhanam, wo heva os ka vei, sembayang vinv indkumbim, henoi si undnahonam lovahthamnavvm kam, noinda hona indhanana moara. <sup>21</sup> Ara, kava sembayang vev, os no indhanamba temba kamba undnahonamba lovahthamnavpa, heoa mongawatindilm nilhaprara. Yimba kaina av, eva kava yeinda av. Kava sembayang vev, os hona indhanamba eva heoa saivundata mongawatindilm piindaoa, osm indkumbiva pethanindva si nungeilvra, osva ye kamba wolaihprana.

<sup>22</sup> Kava doa kavna pusambamba ambara lev-rahoolothunna hona indhanamba, nomba yimba temba kamba wulamnanamba. Kava osva vinna, osm heoa noinda mongawatindi ara, os men vei, ye eva ka. <sup>23</sup> Kava si einvra heinda, wo

yimba si avra kainda. Wo himba si wohavra mongawatindinonowolm. Wo pethanindva indkumbiva si os nunglivav, osva yimba und vev wol vev hona indhanamba, os men pev kam und vevm.

<sup>24</sup> Ara, kava ninginv hona indhanam, men pev kam wolamnanam, waieuvmona velm kamba, hem eva ata kava kavhova gavta. Kava os ninginv hembra, heoa kana pusambamoanunglira. Honamba memba pusambava, ye kam vraohna, noinda yimba doara doa kamba und vena, pethamba yimba os venamo. <sup>25</sup> Ara, yimba noi besalnonoa. Pethanindva yemba lihevmoa. Heva os kava kavpa lihav yemba, wo hona indhanamba lihev, osva ye kamba wolaihaprana. <sup>26</sup> Kava novpa wuleihinna hembra, osva yimba snal. Wo henga kava si nov pewoleihinvav hembra, osm yimba snanovna av. Wo himba si avra wevsa besalna, wavra vovhoamnalmba hevmba, snana ye ten kavm wavra vovhoamnavnam. Wo kava si einvra hemera.

## 18

### *Yesusmba Doa Kevrina.*

*Matiu 26:47-56, Mak 14:43-50, Luk 22:47-53*

<sup>1</sup> Nonamba Yesusva sembayang vepianamba, wo doa himba hevtindimba nominiva os wongana. Himba anganamba, Kitron pom lovol venamba, os angana. Wo no Kitron ponamilla Oliv Denwit osomba di lohvna. Wo Yesusva hevtindimba dom wongana. <sup>2</sup> Yutasva nonora lohvna doara, osva ona, hona denwitva ten nolhra lohv, manara, Yesusva doara di wonalohvnam

no denwitmusrava. Yutasva henoi, ten Yesusm henga imharavhoamnanam, indkokla vrelm Yesusm. <sup>3</sup> Wo doa Yutasva siheinvna, deisumbi prolmba ungrundmba domba osoramba. Himba nom wonprona, vena, valgonindm, polisim. Polisiva nomba himba sembayang andranindna kuwulna, eva Varisinindna. Wo himba noi wulprovna lampu, wokla, bunevalgo.

<sup>4</sup> Yesusva doara nengna, osva manimani ata kamba os venavav. Doa hev phonamba, unna, anm hevpa yimba aslavl? <sup>5</sup> Wo no indhana opulvona, Yesusm Nasaretrinim kava aslavl. Wo doa Yesus unnam, kava menta. Yutasva nomba temba Yesusmba ungrundmba novpa wuleihinnamba, himba di wonlohvna ungrundmba. <sup>6</sup> Nonamba Yesusva osva ovnamba, kava menta, nomba indhanamba henga mumus ovna, lelga vevnam, os vendral vevna hembra petharamba. <sup>7</sup> Yesus henga opla vrinnam, anm hevpa yimba memba etepevolv? Wo hev opulvona, Yesusm Nasaretrinim.

<sup>8</sup> Yesus unna, yemba kava os uni, menta kava. Wo yimba kamba memba aslavpa, nooa indhanaoa heoa henga angara. <sup>9</sup> Honamba vena memba, osm Yesusna moamba doara lohna, osva ona, sewonamba si os phovav. Kava mongomba novkasowava nombolvhoanamoia indhanarinimba, nomba yimba temba kamba wolannanamba.

<sup>10</sup> Simon Pitava doara wulluhvna ovlakasva. Hev dandwonam selvoranamba, nona sembayang andranindna kuwulna andranindrinina angol singeitpingamna. No andranindrinina nihilva Malkus. <sup>11</sup> Yesus omnana Pitamba, henga

vilitho ovlakaso a hevna kella pevnaoa. Es hevpa yimba os nengvma, kava hona kinoa velahara, memba aramba kamba piapramniva, owai.

*Yesusmba Waiangavna Anasindam.*

<sup>12</sup> Doa vena, valgonind eva hevna kuwul, eva Yutanindna polisi kevrina Yesusmba. Wo doa saongna ningivna hembra. <sup>13</sup> Doa os Anasindamsna waiangana. Anasva Kaiapasna meral lohva, wo Kaiapasva sembayang andranindna kuwul luhunvna no tahonnamba. <sup>14</sup> Kaiapasva henoi, ten doara ishunnam Yutanindm, os besal hevma, osvva mongawa indhanarinim daheinvav indkumbimba.

*Pita Unna, Kava Tit Venav Yesusmba.*

*Matiu 26:69-70, Mak 14:66-68, Luk 22:55-57*

<sup>15</sup> Vena, Simon Pita, eva mongo owallini Yesustindi, epawohamnavna sis Yesusmba. Owalliniva nomba himba lihavna sembayang andranindna kuwulmba honamba. Wo noinda himba pethanginvna sismba no kuwulna pueilmeramba. <sup>16</sup> Wo heva os Pitava di lohva murapeta tuvpehal. Nomba Yesustindirivna, himba lihavnam sembayang andranindna kuwulmba, himba henga phovna ambalam. Hev omnana ungevlirinim di tuvra, wo waisihana Pitam meram.

<sup>17</sup> No ungevlirini di tuvra lohvam, himba omnana Pitam, ye mongova menta no indhanarinina sehelva? Pita ophona, owai, kava tit vev. <sup>18</sup> Nelpongma eiswol vevna, doa vena, andranind eva polisi suwemba singvina. Wo himba di kusovna suwera nelpongma. Wo di Pitamba

pathawulvahvna doara himba, suwem dawol velm.

*Sembayang Andranindna Kuwul Sah Ovravna Yesusmba.*

*Matiu 26:59-66, Mak 14:55-64, Luk 22:66-71*

<sup>19</sup> Sembayang andranindna kuwulva sah ovravna Yesusmba, nom vena hevtindim, eva hev ten numhowol vevnam. <sup>20</sup> Wo Yesus opla vremnana, kava ishunvna musera indkumbimba. Kava numhowol velohvna sembayangduvmera, eva di tempelmera, di ten Yutanind kusolohvna mongawatilm. Kava owaimomolmba ishonamoana vepamomba poaitava. <sup>21</sup> Wo manara yimba kamba sah ovrav? Sah owol veo indhanam, nom ten kana moam hillivnamba. Himba nonora av, nomba temba ishovnamba.

<sup>22</sup> Honamba osva ona Yesusva ishona, mongova polisiriniva di doara lohvna, he phona, di sang oplov Yesusm. Hev omnana, wo tanam ambo osma, ten pev ishomnavm sna moana pina sembayang andranindna kuwulm? <sup>23</sup> Yesus opla vremnana, kava moangakalamomba ishotava, wo os u, mani indkoklava vev. Wo heva os nom kava ishovpa tanamba, wo manara yimba kamba sang polavoi? <sup>24</sup> Wo doa Anasva venamba, Yesusmba wolaihangavna Kaiapasindam, sembayang andranindna kuwulindam. Yesusva mendah wena ningiwulvahmana vevna.

*Pitava Henga Onam, Kava Tit Venav Yesusmba.*

*Matiu 26:71-75, Mak 14:69-72, Luk 22:58-62*

<sup>25</sup> Simon Pitava di lohvnamba, hevum suwepavna vrevna. Wo hev umnina, es hevpa yimba no mongo indhanarinita Yesustindirinita?

Wo Pitava helwolnamba, wo hev unna, owai, kava hetindiriniva lohvmoa. <sup>26</sup> Mongova sembayang andranindna kuwulna andranindriniva doara di lohvna. No andranindriniva henona owal, ten Pita angol singeitpingamnam. Wo he ophona, kava os nengv, kava doa yemba nonglasambaihai Yesusmongo oliv denwit osorava. <sup>27</sup> Henga Pita tonam, owaimomoa, wo doa henanam ayamba os ophona.

*Doa Yesusmba Waiangavna Pailat Duangindamba.*

*Matiu 27:1-2 eva 27:11-14, Mak 15:1-5, Luk 23:1-5*

<sup>28</sup> Wo doa Yutanindna kuwulva umninamba Yesusmba Kaiapasna deuvriniva, os waiangana Rom duangna deuvramba. Mendah kuk vilihapihavna simolnonoam. Yutanindva nomba no Rom duangna pueilmeramba saivnamoa. Himba hevnapenam vivna, manara noinda himba Pasova tihinnem hlalm vevna. <sup>29</sup> Wo noinda Pailat duangva ambo amballamba phunna hembra. Wo hev unna, henamonana yimba hona indhanarinimba sahonamba waiambe? <sup>30</sup> Wo hev umnina, himba indhanarinikokla tetevul vrevna mindnam. Memba noinda kava waiambe hembra yeindamba.

<sup>31</sup> Wo Pailat unna Yutanindmba, waiangarava hemoa, yea pev ambo wetat u pevna lohohmona. Wo hev opulvona, heva os kanamba luhunvmoa, osmba mongomba indhanarinimba opulvolmba, helvakomandhalmba kruserava. <sup>32</sup> Honamba moamba wohlehvravna nom, ten Yesus doara ishonam, ona, os si kamba kruserava dahavav, si os

wohvevav. Memba osm, Romnindva si os vivav, Yutanindva hevpa owai.

<sup>33</sup> Wo hevpa henga os sihana hevna deuvmoramba. Wo hev Yesusm das ovrnamba, hev omnana, es hevpa yimba Yutanindna king kuwul luhunvma? <sup>34</sup> Yesus omnana, es hevpa temba yena pevna moama, indhana mongla yem koho ishumnimi kamomba yemba? <sup>35</sup> Pailat ophona, kava Yutanindriniva owai. Memba vei, yena pevna indhana, eva pevna sembayang andranindna kuwul, he yemba waiambeihomba kaindamba. Mani yimba vena sahoklalva?

<sup>36</sup> Yesus ophona, katindiva hona pethariniva owai. Himba hona pethariniva lovahtava, himba osva ata alhuta kanilmba, osva kamba ata holvorehuntamo Yutanindmba. Heva os katindiva snamba andrava vivmoa, osva hona pethanindva memba vivpa. <sup>37</sup> Wo Pailat omnana, wo yeta king kuwulva? Yesus ophona, temba yena pevna moamba. Kava memba osm lohv, ishomana vinilm indhanam moanonoam. Memba noinda kava prona hona petharamba. Wo indkumbiva himba nomba moanonoamba amnavpa, himba hilliv kamba.

<sup>38</sup> Wo Pailat omnana, moanonoamba manam uv? Wo himba honamba osva sahmananamba Yesusmba, doa himba os engalphona henga Yutanindna kuwulmba. Hev unna, kava silleloh veni henamba sahoklamba, hembra nonamba wai-isholmba. <sup>39</sup> Noinda kava osm ov, memba yena wevsava luhunv, osva kava wolaihaphunvav buinindrinim yemba hona Pasova tihrava. Yimba ningminivmi kamba, wolaihapholmba hona king kuwulmba Yutanindnamba?



<sup>40</sup> Wo hev di dandwonam opelpanganam, owai, hembra owai, wolaihapho Barapasam. Barapasva himba daosnindrini yukov otol lohna.

## 19

<sup>1</sup> Wo doa Pailatva wohtvna, waiangalmba, helvelm wevdakanam. <sup>2</sup> Wo doa valgonindva tivowosalva kuvunamba, weilvrvina king kuwulna topimsna. Wo himba os weilvholothunamba Yesusna kurava, wo kayen aembul vithimnina. <sup>3</sup> Wo himba esvemava prowovna domba Yesusindamba, wo hev dasalm umnina, ei king kuwul Yutanindna. Pulvovna, di novlomossis vitavhue.

<sup>4</sup> Wo henga Pailatva phonamba amballam, hev unna Yutanindm, nunglu, kava waiphunv Yesusmba yemba men. Kava osm vev, yeoa wiyera ao, os kava nonglamnaimoa mana vemava sahoklalva, osm noina kava ata osva unvav, hemoa dahara krusera. <sup>5</sup> Wo Yesusva pho, nomba tivombo weilvholothumninamba, nonahonam phona. Wo doa Pailat unna, nunglu men hona indhanariniva.

<sup>6</sup> Wo nonamba nomba sembayang andranindna mendeklina, polisinamba nunglivnamba Yesusmba, hev di opelpanganam vevandnam, lepetheiu pakona hemoa krusera. Lepetheiu pakona hemoa krusera. Wo heva os Pailat ophona, waiango hemoa, lepethalmoa kruseramoa yeoa pev ambo. Kava silleloh venei sahoklamba henamba, osm noina kava ata osva ovav, hemoa dahara.

<sup>7</sup> Wo Yutanind opulvona, kanamba doa luhunv lohohmomba, os hemoa dahara, manara noinda

himba os oi, kava Sesoana ombol lohv. <sup>8</sup> Nomba moamba snamba Pailatva hellevnamba, himba pemba os vevna i. <sup>9</sup> Hev henga sihanamba meram, osahmana Yesusm, henamini hevpa yimba? Wo heva os Yesusva hembra opla vremenamoa owai.

<sup>10</sup> Wo Pailat omnana, manara yimba kamba opla vremenamba owai venav? Yimba nonora lohvma, ova manimani kaindangas lohv, yemba hengamba wolaihapholmba, lepethalmba yemba kruseramba? <sup>11</sup> Yesus opla vremenana, manimani memba yeindangasva lohvpa, kam kuvhoalm, Seso yemba hev vraohna. Indhanariniva nomba temba himba kamba holvo-holothoiva yena englarava, henamba sahoklava mendekli lohv, henga yenamba kuvhoav.

<sup>12</sup> Pailatva honamba moamba ova hellenamba, wo himba doa monam silelvna, wolaihangalm hengam Yesusmba. Wo heva os Yutanind di vevandnam opelpanganam, himba nomba hevmba king kuwulalmba awollava, himba Sisana ungundalm lohv. Yimba wolaihangatava no indhanariniva, yimba ova lohvavmoa Sisana sehelva, pivna mendekli king kuwulnamba. <sup>13</sup> Pailatva hellena, ona, pai es Yutanindva eishov, wo doa waiphovna Yesusmba domba, temba ova ningthivnamba, Hon Memba Mongladatholm. Hipru-monamba os alvna, Gapata. Wo himba hevna ovavholla ovhoanamba, di hellevna wetatmomba Yesusnamba.

<sup>14</sup> Okombava hovrahovra lohvnamba, Pasovatihram innesowa noi kokolma vildavna. Pailatva unna Yutanindmmba, men yenamba king kuwulva. <sup>15</sup> Wo doa di Yutanind opelpanganam,

wolaihingu, wolaihingu ehallam, lepetheiu krusera. Wo henga Pailat osihinnam, yimba kam ningminivma, helvakomandhalm yenam king kuwulmba kruserava? Sembayang andranindna kuwul opulvona, pinamba king kuwulva mongasal luhunv Sisaangas. <sup>16</sup> Wo doa Pailatva os wohtna, holvorehunilmba Yesusmba valgonindmba, lepethalmba kruseramba.

*Doa Yesusmba Kruserava Lepetheivna.*

*Matiu 27:32-44, Mak 15:21-32, Luk 23:26-43*

Doa valgonindva waiangavna Yesusmba, lepethalmba. <sup>17</sup> Yesusva pungavna hevna kruseva hev dom nolhram, ten os ningthivnam, Mindna Kukel. Hiprumonamba os ningthivna, Golkota. <sup>18</sup> Wo dita himba lepetheina Yesusmba kruserava. Wo osoa indhanarini samblam di lepetheiwulna, vena, mongnasis mongnasis, Yesusmba hovra.

<sup>19</sup> Wo Pailatva moapetava novol venamba, di sena krusera novol vepetha. Os novol velohvna,  
MEMBA YESUSVA NASARETRINI, YUTANINDNA KING  
KUWUL.

<sup>20</sup> Wo nomba moamba os novol velohvna Hiprumona, Romnindmona, Grikmona. Indkumbiva Yutanindva beswonam nonglakhov vrevna, manara noinda di nolhrata, ten helvakomandhinata, murapeta kotara. <sup>21</sup> Wo noinda sembayang andranindna kuwulva osva Pailatmba umnina, manam osva yimba novol vei, Yutanindna king kuwul. Os novol veta, hona indhanariniva os ona, ka king kuwulva luhunv Yutanindnamba. <sup>22</sup> Pailat ophona, memba kava osva novol veiva, ata os wohnovol velohvav.

<sup>23</sup> Valgonindva Yesusmba lopo vipieinamba kruserava, himba kayenmba os pelvwol vinina. Wo venamba, himba os pepemowilvna, vena, mongo dembhawilvna, mongo dembhawilvna. Wo nomba valgonindva vena, mongo endombwolna, endombwolna. Wo hev vena, bayu tokol moanvreimnina. Os nunglivnamba, mongal wohkuendlina, dipeh venamba, dingoho mutengra. <sup>24</sup> Wo nomba valgonindva hevm eishovna, manam pimba popowol vivav eskandva eskandva, owai, pioa kat velohra, verava, ora henoi win vev, wo osva henoi hevmba moanvravav. Honinda temurava hona moana plalva wohvelokusethiv tombaimorava,

Himba kana pikianmba hevm among vena. Wo himba kat vivna, kana pikianmba moanvralmba. *Buk Song*

*22:18*

Hona wevsana valgonindva vina Yesusna pikian-dava.

<sup>25</sup> Wo vena, aval, avakondal, eva Maria, Klopasna ongal, wo Maria Maktala, himba di murapeta lovahvna Yesusna krusesingi.

<sup>26</sup> Yesusva nongalna, vena, avalm eva hevtindirininim, nom hev ten und vevnam, ona, men elohv. Hev omnana hevna avalmba, ava, men yenamba ombpevpa. <sup>27</sup> Wo henga omnana hevtindirininim, men yenamba avapevpa. Wo nonamba no Yesustindiriniva Mariamba os waingana hevna deuvram.

*Yesusva Ongopienvna.*

*Matiu 27:45-56, Mak 15:33-41, Luk 23:44-49*

<sup>28</sup> Doa venamba, Yesusva nengna, manam manam temba kamba vilimbminiva, doata, osm doaramini tombaimom wohengvna. Doa hev onam, kamba peha venav. <sup>29</sup> Doara di indtholohvna wainmba botelna peplavhona, wo doa valgonindva lembetasna kovovrinamba, wainda velthapuv ve. Wo venamba, ona, doa wainmba mera vetha, doa wandtanglara ningewulinamba, wo os yithasuv vena Yesusna mengrava. <sup>30</sup> Wo Yesusva nenamba, wo hev ona, doata, os kuva koavpemnavna, dahavna.

<sup>31</sup> Hona nambainamba doa manimani kokolma vildavna sapturam, wo mongnasiva vah iaevul okambamba mendekliya pulpulvovra. Wo non-amba Yutanindva os vivna, owaimomolva mongova mindva senamba tirava vendendvavmoa detiva hona sapturamba mendeklikumbiva. Wo doa himba sah ovralm angavna Pailatm, wohtelm, os no indhanamindna kemonglam tetai vewol vinilm, osm lilnam dalvra, wo os nihilva vindinga vevra.

<sup>32</sup> Wo doa valgonindva puvulpronamba, no mimirinamsna tetai vewol vinivna, ten vendendvnam krusera mongnasis Yesusinda. Wo henga henona, ten mongnasis Yesusinda vendendvnam. <sup>33</sup> Wo heva os valgonindva Yesusindava ona pulvona, wo hev nunglina, doa doara dahai. Wo noinda himba kelva henamba tetai vewol vininamo. <sup>34</sup> Wo heva os mongo valgonindrini he englabonana di hilvho almangval. Wo tovolva di maim ona napom shueiva, nungi lelnam sovhosapena.

<sup>35</sup> Himba nomba honamba memba nonglanamba, osva ona, os honakowa phov,

he ishov temurava. Manam manam himba memba ishonamba, tanamolnam. Himba nonora lohv, osva kava tanam ishov. Himba ishov, osm eva yeoa honamoa kek vithivra. <sup>36</sup> Honamba manimani memba venamba, osm tombaimomba wohengvra,

Owaimomolva henamba kelva tuvhueinamoa.

*Buk Song 34:20*

<sup>37</sup> Wo mongova tombaimomba os ona, Himba si nom naengho vrivra, ten hev lunam bunena. *Sekaraia 12:10*

*Yesusmindmba Honmera Vindithina.*

*Matiu 27:57-61, Mak 15:42-47, Luk 23:50-56*

<sup>38</sup> Wo doa venamba sismba, Yoseppa Arimatjariniva gavna, sahmanalm Pailatm, vendgualm Yesusmindm. Yoseppa Yesustindirini lohvna, heva os himba hevmba komandhavna, noinda himba pem vinvna Yutanindnapenam. Pailat omnana, wouta. Wo Yoseppa vendvenamba, os vendguana Yesusmindmba. <sup>39</sup> Nikotemus pethamnana Yosepmba. Nikotemusva himba noi, ten hesna mi pronam sinim, nonglalm Yesusm. Himba sandava mindnam iprona, kinmba os vevna 30pelara kilo. Timba sambra no nenelna vewulna, vena merna, alosna.

<sup>40</sup> Wo Yosepiva Nikotemusiva Yesusmindmba evendvenamba, wo no sandana engovhoa, wo kayen besalna eningena. Men hona wevsana, Yutanindva mindmba singvevna. <sup>41</sup> No vuherava temba Yesusmba valgonindva lepetheinamba, diva lohvna denwit doara. Wo no denwitmusra diva doara lohvna honmeva, wo owai, doarava doava mongomba noindava singvinamoa nemetva, khui mendah lohvna. <sup>42</sup> Wo no mella

himba di evindithana Yesusmindmba, manara noinda di ambo mumra lohvna nomba honmeva, wo doa vah iaevul okambamba mumra vrivna, loholm.

## 20

*Honmeva Nis Lohvna, Yesusva Doara Phona.  
Matiu 28:1-8, Mak 16:1-8, Luk 24:1-12*

<sup>1</sup> Minguram Maria Maktalava gavna pokamaram, wo nonamba mendah kilvrilvna simba. Mariava nonglavna nom hon mendeklim, ona, pai doa honmba ahnam vileilv kewulva. <sup>2</sup> Mariava dandwonam velavravna dom Simon Pitaindam, eva mongom Yesustindirinin, nom ten Yesus hev mindnam und vevnam. Maria unna, anmundvema doa vindvi mendeklimba pokamariniva? Kava tit viv, hi dihi vindlihei hembra?

<sup>3</sup> Wo vena, Pita eva he dandwonam evlarombtvna dom pokamaram. <sup>4</sup> Dandwonam evlarombtvna, henoi koho, henoi koho, wo heva os owal Pitamba kuvhoana. Wo owal hesna phona miva diva pokamarava. <sup>5</sup> Hev vithanamba, novvesiha ve pokamaramba. Nonglana, ona, owai, men kayenmba moanvilv, heva os owai, himba sihanamo domba meramba. <sup>6</sup> Wo venamba, Simon Pita pronam. Hev sihanamba pokamaram, nonglana, ona, men kayenmba moanvilv.

<sup>7</sup> Hev vena, nom nonglana kayenm, ten Yesusna kum nona ningimnam. Nomba kayenmba mon-gawulmba moan evahilwolvnamoa, pepetowol velohvna, wo indakonda moanvehalohvna. <sup>8</sup> Wo eva henoi siha, ten hesna mi pronam. Himba nonglavna, ona, tanam doa Yesusva phoi. <sup>9</sup> Himba

mendah levra epievnamo a honamba temurava tombaimomba, o sva Yesusva si phovav henga pokamariniva.

*Yesusva Yumna Velana Maria Maktalam.  
Matiu 28:9-10, Mak 16:9-11*

<sup>10</sup> Wo doa os henga himba engana deuvram.  
<sup>11</sup> Mariaoa di lohna ambara pokamara wena. Nonamba himba wivelohvpa, hev vithanamba, novvesiha ve pokamaram. <sup>12</sup> Himba nongalna, ovsongolnindrini samblava, doa vewol evei kayenmba dombal. Di ahavna, ten nolhra Yesusmindm vindilnam, mongova kuis avna, mongova mutengsis avna. <sup>13</sup> Hev ohosahmana, manara yimba wivev? Hev ophona, anmundvema kana mendeklim vindviva? Kava tit vev, hi dihi himba vindlihei hembra.

<sup>14</sup> Nonamba Mariava honamba o sva ona ishona, himba henga ona imharavhoana, nonglana, men lohv Yesusva. Wo heva os himba o sva nengnamoa, memba Yesus, owai. <sup>15</sup> Yesus osahmana hem, omnana, manara yimba wivev? Wo anm yimba hevpa silelv memba? Mariava os nengvna, memba denwit andranindrini olohv. Wo hev omnana, wo es hevpa ye vendguaima mendeklimindmba? Ishomno kam, hi yimba vendpikai hembra, wo ata kava vendvevav henga hembra.

<sup>16</sup> Yesus omnana, Maria, Mariava novlomossis imharavhoanamba Yesusindam, wo omnana Hiprumona, Raponi, osm uv, guru. <sup>17</sup> Yesus omnana hembra, ata ye kam kevrvav. Kava mendah vongavmoa araindamba. Heva os gao, katindimoa ishunu honamo a. Kava henga gav



yena kavna araindam. Kava henga gav yena kavna Sesoaindam. <sup>18</sup> Maria Maktalava ganamba, wo hev unna Yesustindim, kava nonglai doa mendeklimba. Wo eva hev vena, nom ishunna, ten Yesus hevm ishomnanam.

*Yesusva Ambara Vithinvna Hevmba Hevtindimba.*

*Matiu 28:16-20, Mak 16:14-18, Luk 24:36-49*

<sup>19</sup> Ambo nonamta minguram, okombava vohavnamba, Yesustindiva mongawaduvra mongawatilm kusonamba, di aevulvna. Tuvpa kolvowol vinamba keknam, noinda himba pem vivna Yutanindnapenam. Wo doa Yesusva pronamba, hovrahovra di lohvhueinnamba. Hev unna, yeoa beswonam undwonam ao. <sup>20</sup> Henanam himba honamba osva unnamba, doa vena, engla nethawolna hevna, eva almangm. Wo hevtindiva indk vethappravna, nonamba himba nunglivnamba mendeklimba. <sup>21</sup> Wo henga Yesus unna, yeoa beswonam undwonam ao. Ara kamba wolaihaprana, ka men eva yemba wolanga vungu vev. <sup>22</sup> Honamba himba osva ishopianamba, doa hevna vavatan povholothunnamba, unna, dumbu Sesoasongol. <sup>23</sup> Yimba selvhinvrava mongla indhanana indkoklamba, henamba os hoai vilunvra. Yimba selvhamba owai vinvrava, osva henamba wohluhunvra.

*Yesusva Hevm Holvonethamnana Tomasm.*

<sup>24</sup> Tomas, eva mongova nihilva Ditimus, himba owalmongova aevulvnamoa, nonamba Yesusva provnamba. Tomasva mongo noi 12pelara, ten lo-vahvnam Yesustindi. <sup>25</sup> Wo mongla owal hevtindi

umnina Tomasmba, kava doa nungli mendeklimba. Wo eva os Tomas ona, kava nengvmoa, heva boasna pakovholm englarinim ka nonglamnarava kavna novna. Wo kava si hellevavmoa, heva verava, boasna ka kavna englapund piasaharava di pakovholla, eva di almangsis bunevholla.

<sup>26</sup> Wo mongona minguramba hevtindiva henga deuvra kusovna, wo Tomasmba di waiaevulvna nonamba nihra. Tuvpa doara kolvowol vina keknam, heva os Yesusva sihanamba, di hovrahovra lohvhueinnamba. Hev unna, yea beswonam undwonam ao. <sup>27</sup> Wo doa hev omnana Tomasm, lotho pevna englapund hui. Nonglo kana englam. Piasaho pevna engla hui kana almangshara. Wuleiho sambla undmoa, kamoak nam undnahonam lohvhooamno.

<sup>28</sup> Tomas omnana, yimba kana mendekli, yimba kana Sesoa. <sup>29</sup> Wo Yesus omnana, yimba noinda ov, ambo yimba kam nonglaiva. Himba nomba temba nonglamba novnamba owai vivpa, wo keknam lovahmanavrava kamba, si tanamolnam indk vithivav.

### *Manaram Yonmba Moalamangnindriniva Novol Vena Hona Tombaiva?*

<sup>30</sup> Yesusva vewol vena mindnam monglava mendekliandrava hevtindina novrava, heva os novol velohvmoa hona tombairava. <sup>31</sup> Wo heva os memba novol velohv, osm yimba nonora avra, osva Yesusva Kristus lohv, Sesoana ombol. Undnahonam keknam lovahthamnallava, yimba osvav avav undna hena nihilla.

## 21

### *Yesusva Nongalphona 7pelara Hevtindimba.*

<sup>1</sup> Hengava sismba Yesusva hevmba ambara vithinvna hevtindimba di Galiliplombra. Men nomba yunam os vina nonamba. <sup>2</sup> Wo hevtindiva himba noi vivna, vena, Simon Pita, Tomas, Nataniel Keina kembellini Galili provinsrini, Sepetina ombolsambla, eva mongsambla henga. <sup>3</sup> Simon Pita ophona, kava gav tambkovalm. Wo mongla owal unnam, kava ata yemba engambvav. Wo doa hev anganamba, botra vongopia. Wo nom sim svopinginam, venamba, owaimomolmba, mongova tambkova wevrinamoa.

<sup>4</sup> Doa venamba, kuk vilihapihavnamba, Yesusva ambo di engalla timimsna hellevholohvna. Wo heva os hevtindiva osva liheivnamoa, temba Yesus lohv, owai. <sup>5</sup> Wo doa hev unna, seh, es hevpa yimba aiv owaimomolmba werombol vima tambkova? Hev opulvona, owainonoa. <sup>6</sup> Wo hev henga unna, piapovo pevna pohlalawondaoa botna nihanasis, wo ata yimba os werombol vivav monglava tambkova. Wo himba vina os honamba. Wo himba esvemava owouspulva ishuvna tambkova, osva owai, es eva ata pohlalawondava wulimbta domba botramba hengava.

<sup>7</sup> Nomba hevtindirininimba, nom ten Yesus hev mindnam und vevnam, himba os omnana Pitamba, memba mendekli. Nonamba Pitava hellevnamba, osva ona, os ov, wo himba nungi lelnam henga vethana hevna kayen tokolva. Pitava doara selvlahanam hevna kayenmba

andraram. Wo himba os viliavhoanamba pomera, ganamba, mongnamilm pho. <sup>8</sup> Owalva botra lovol vena mongnahalmba, kololasva wulangavna tambkowondava. Eva mani ehallama, mongnamilva ambo mara os men ten. <sup>9</sup> Nonamba hevtindiva pihipiavnamba botriniva, wo kusovna di engalla, ona nunglina, suwemba men lon vev, wo no suwerava tambko peltavna, roti pilvna. <sup>10</sup> Wo doa Yesus unna, iamb veo mongla tambko, noi ten pev dumbim.

<sup>11</sup> Simon Pita botram sihanamba, tambkowondam dom waipiha engallam. Mendekliangas snal loihangavna i. Nomba tambkova os lohna 153pelara, eva mani eskandma owai, heva os pohlalawondava vitvita vepenamo. <sup>12</sup> Yesus unna, ambo, doa hlao. Hevtindiva pem viwul vevna, an eva ata sahmanata hembra, osva, an hevpa yimba? Liheivna, osva memba mendekli. <sup>13</sup> Yesus pronamba, roti vranamba, daswulungu vevna. Wo osoa tambkova eva os vinnata. <sup>14</sup> Memba doa Yesusva yehol vepiavna, ambara vithinilmba hevtindimba hevmba, nonamba sismba temba phonamba hengava pokamariniva.

### *Yesusva Ishomnavna Pitam.*

<sup>15</sup> Nonamba himba innemba hlapianamba, doa Yesus omnana Simon Pitam, Simon, Yonna ombol, es hevpa yimba ambo mindnam und vevma kamba? Wo yimba owapevmba kuvhoawol vev. Hev opla vremnana, eye, mendekli, yimba nonora, os kava yemba und vev.

Yesus omnana, kekalvho vrinvm kana sipsip otolm, inne dahwol vevm. <sup>16</sup> Henga Yesus omnana, Simon, Yonna ombol, es hevpa yimba

kamba und vevma? Hev opla vremenam, eye, mendekli, yimba nonora, osva kava yemba und vev.

Yesus omnana, kekalvho vrinvm kana sipsipm, inne dahwol vevm. <sup>17</sup> Wo henga Yesus tomnanam, Simon, Yonna ombol, es hevpa yimba kamba und vevma? Pitava lous vovhoana, manara noinda Yesus henga no mongawamona osahmananam, es hevpa yimba kamba und vevma? Pita omnana, mendekli, yimba manam manam nonorangas lohv. Yimba nonora, osva kava yemba und vev.

Hev omnana, kekalvho vrinvm kana sipsipm, inne dahwol vevm. <sup>18</sup> Kava ishomnav yemba tanam. Yimba nonamba tendotowondva lohvnamba, yimba pevna banmba vethavnamba, wo nona lohmana vevna, domba yimba pevpa temba galmba vevnamba. Wo heva os yemba mundilva vevrava, yimba si pevna englava liowolvrava, wo mongo yemba ningevra. Himba yemba dom si wailovahmana vevra, ye dom galm owai vevram. <sup>19</sup> Yesusva olhmanavna honamba, osm ora, os si Pitamba dahavav, Sesoana nihilm okolalm. Wo henga Yesusva omnana Simonmba, pethamno kam.

<sup>20</sup> Pitava haravhoanamba, nongla owallinim, nom Yesus hem ten mindnam und vevnam, ona, men sis kamba petheinv. No indhanarini he ten ku nithanam Yesusinda murapeta, doara nonam inne wonnevnam, wo onam os, mendekli, an yemba ata ungrundmba holvonithinvav?

<sup>21</sup> Nonamba Pitava osva ona nonglana, men sis kam engalprav, hev omnanam Yesusm, mendekli, eva hona indhanarinimba, si es yimba venavav?

<sup>22</sup> Yesus opla vremnana, kava osva nengtava, himba si yunalm wohavav, verava, henga kav provram, mani memba eva yena mana vemama, a? Yea ambo kam pethamno. <sup>23</sup> Wo doa moamba henamba owalindava siheingu vinvna, os, hona indhanarinimba si dahavavmoa. Wo heva os owai, Yesusva osmba onamo, hembra si dahavavmoa. Himba ambo os ona, kava undva vretava, osva himba si avav, os verava, kav provram henga, honamba eva mani yena mana vemama, a?

<sup>24</sup> Nomba hevtindiriviva noita men ishovm hona moam. Himba noi men hona moam novol vewol venam. Pivva nonora, osva manam manam himba temba ishonamba, tanam. <sup>25</sup> Lohv esvema nomba manimani, memba Yesusva venamba. Wo nomba manimani temurava tombairava novol vetava, kava os nengv, huiva hona pethava eva mani mendeklima, tombaimba nomba lehra vethalmba, temba novol vewol vivavpa. Doata Yonna Yesusmoa.

**Sesoana Besal Nemelmoa Walsana Moana  
Genesis, Ruth, Jonah, and The New Testament in the  
Waris Language, also called the Walsa Language, of  
Papua New Guinea  
Buk Stat, Rut, Jona, na Nupela Testamen long tokples  
Waris long Niugini**

Copyright © 2002 The Bible Society of Papua New Guinea

Language: Walsa/Waris (Waris)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

---

PDF generated using Haiola and XeLaTeX on 22 Feb 2024 from source files dated 31 Aug 2023

81136742-8dfd-57f5-95ae-cd3afb267b0d